

青  
芝  
山  
館  
集

序

昔楊莊誦文稱彼邑人李實進賢記其同里茲風邈  
婉焉若夫許劭申月旦之評宋玉譽陽春之曲江東  
當獨秀雖各私其鄉亦天下之公論也余編輯江西詩徵列  
名二千餘家綴論五十四首於晉高彭澤之風於唐妙新吳  
之唱宋則廬陵樹幟而王黃張其軍元則道園震鈞而揭范  
赴其節迨乎

國朝蔣楊繼作風流未沫神理共契然其人往矣每歎嗣響爲  
難斯道奚屬不圖同世乃有樂生君載臨川之筆觀廣陵之  
濤萬余題襟館中常淹歲晷傾囊舊作已到古人授簡新篇  
輒驚儕輩或蕪城弔古或蜀岡懷人或悲芍藥之餘春或愛  
芙蓉之初日神采煥發煙墨橫飛草石開鮮江山壯氣余嘗

參預其際不廢苦吟及誦君詩欲焚筆硯何也詩之能動人者非其辭也乃其意也劉勰之言曰詩人什篇爲情而造文詞人賦頌爲文而造情世或體情之製疎逐文之筆盛英華彌褥真宰弗存鍾嶸之言曰庸音雜體各爲家法又曰師鮑昭者終不及日中市朝滿學謝朓者劣得黃鳥度青枝蓋矩矱在先民而神明在我也繩檢盡廢則牛馬而襟裾揣摩太熟則衣冠而優孟作者之病出此人彼今覽斯集庶幾免焉淵明以下諸公爲詩徵傑出者良亦在是然君之所長匪惟以詩諸體之文靡不奇麗而年幾強仕一第尚艱余忝鄉人徒爲此序而已嘉慶九年歲在甲子八月南城曾燠

序

有言之所及有言之所不及言之所及而有其所不言者存焉言之所不及而有其所欲言者出焉詩之教固如是其溫柔敦厚也顧或謂發憤所作發憤者溫柔敦厚之作而致其極者也審是得吾友臨川樂蓮裳而有所伸吾說於天下蓮裳蚤入京師稱於京師也久出遊齊魯吳越遠之楚粵稱於齊魯吳越楚粵也久余獨未之獲見自頃二三年往來揚州相與娛遊盤礴上下習其行事有以得其人又出生平所作五七字長短句讀焉而有以得其詩比者辱以詩來屬爲之序蓮裳之詩冥索元間顯豁象外綢繆而成天矯而出無善醜貞淫正變而一肖乎其事之所適然無洪熾抗墜紆蹙而一稱乎其情之所必達不自知言之所及與所不及而其所

欲言所不言者常使人恍然遇諸天游抑豈非善爲言者乎  
劉向之說詩曰思然後積積然後流流然後發揚雄曰志莫  
辨於詩夫非溫柔敦厚之至乎其極何以思何以積何以流  
有其思焉積焉流焉者因以發而爲憤遷之所謂發憤亦雄  
之所謂辨志云爾有蓮裳之志則必有蓮裳之詩蓮裳之志  
非一世之志則其詩非一世之詩由是發德宣功上以推揚  
國家懿烈扶樹理本人事浹天紀昭得志於時之爲之也由是  
集微揆著下以申告民間疾苦風曉在位不得於時之爲之  
也蓮裳於今天下爲有數人物年盛力彊方當出乘際會爲  
龍爲光以爲

聖天子分憂導福秉職程能吾無以測其異日所至又烏乎序其  
詩之所極也哉或曰子之稱蓮裳至矣獨無可以進蓮裳者

乎余曰非也吾序蓮裳詩是謂以竝世之人而序其未已之業者也以竝世之人序未已之業而欲待以伸其說其稱之也其進之也蓮裳知之知蓮裳者知之矣嘉慶八年重九日長洲王芑孫

青芝山館駢體文集卷上

臨川樂鈞元淑

聞雁賦

賓雁流音遊子惕心於時玉弓東挂紅鏡西沈燕雲孤橫遼  
天晚陰嗷嗷乎廣澤蕭蕭乎中林響續城碁聲先戍柝若霜  
氣之入鐘疑星心之在角勁絃激潏羸車曳鐸爭曛晦之須  
臾寄咿嚶於寥廓想其來自高柳睇彼搏桑北迷碣石南阻  
衡陽霄衢旭卉海路混茫俯鴉身而日淡仰鶴趾而風強遂  
乃朝落雲汀夕趨煙渚白沙印爪黃蘆刷羽順迴颶以整行  
倚飛霞而嘯侶驚何爲而尋魚鴟何爲而嚇鼠自託於天無  
爭此世咏棲畝之餘糧拾在原之秋蒂羨旅燕之先歸愧儀  
鸞之遐逝疑夜火以驚翔感蕭辰而悽唳由是候館邊樓荒

江古驛警夢中宵呼愁永夕亦有思婦青閨嬌娥素帟遙憶  
關山悄停刀尺寒燄短落葉聲乾心慙朔吹耳恍哀彈此  
皆有聲斯感有感斯歎矧茲禽之惋惻疇意帖而魂安若夫  
絲竹繁會檀麝氤氲廣羅簪履旁列釵裙衣香橫霧酒氣薄  
雲雖悲吟其嘹唳固沈寂而不聞

憶梅賦

客離居兮朔北有佳人兮南國望驛路兮迢迢懷江鄉兮惻  
惻斯時也燕關雪後遼海春前日光淡樹冰氣塞天風埽階  
而墮葉月潑地而流鈎悄獨立兮庭中羌誰來兮林下頽愁  
心兮莫訴渺予衷兮一寫想夫古幹屈蟠橫枝媚越凌陰獨  
冶犯寒先發乃梅之骨爛池畱影偃石吐芬瑤環拂檻縞袂  
當門乃梅之魂若乃短笛素琴清酌微吟助靚妝於明鏡引



芳夢於孤衾是曰梅情有心無心友長松侶脩竹儷幽蘭紹  
疎菊伴明月兮空山枕蒼苔兮野屋是曰梅品遺世絕俗至  
其魁羣壓嶽蓄氣乘時信風首應芳草未知蜨來旣晚燕到  
猶遲梅之隱也亦梅之奇及其玉綴珠離脂輕粉薄雪豔輪  
花冰瑩遜萼檜柏形穢桃李顏忤梅之姿態何其綽約自我  
不見于今三年局我舊閣冷我小園空我酒尊閒我吟牋願  
爲淨土爲子培根願爲微風爲子解顏願爲明月照子嬋娟  
願爲游絲與子纏絲迴石腸而百結撫冰心而自憐憶復憶  
今天咫尺遠復遠兮路三千於是若醉若夢恍恍低徊風露  
滿庭簾箔忽開彼姝絕代翩然而來含睇宜笑卻立瑤階是  
耶非耶歸哉歸哉

嘉蓮賦

井序

芙蕖共蒂古曰嘉蓮潮州監司使院之西園荷池十畝有紅白兩品嘉慶丁巳閏六月各出一莖合跗同幹竝日而花於是主人異焉製詩紀事屬余賦之余嘗循覽斯園見有嘉蓮頌嵌石壁間爲乾隆丙戌七月初三日所勒蓋我生之日也然則斯蓮之異在昔僅有越三十二年乃復覩此洵僥倖之嘉瑞抑余亦有巧契焉故勉抽短穎希其形似其辭曰

北沼兮南塘縞袂兮紅妝千情萬態接葉交香粵有雙蕖特標豔異孕萼同茄舒華共蒂伊兩幹之同符乃胚渾於一氣託白玉以爲根倚翠蓋而相媚仰華月而心同俯清漣而影儼初如漢皋遊女凌波結侶交甫未逢懷珠不語又如江左二喬中閨寂度旣靜且閑芳情漸露繼如越國施旦初及吳宮肌香乍透寶髻全鬆又如邢尹懷羞迴身背面相妬相憐

無由一見至乃微風拂波仙袂飄舉如廣延之二妹舞紫塵  
與集羽或則薄霧低韞輕煙淡籠如飛鸞與輕鳳隱瑤帳之  
重重若夫鏡月高懸珠露暗下有若英皇挾瑟清夜涼雨初  
收洗脂滌玉有若昭陽姊妹新浴疑翠水之仙姝偶淪謫於  
蓬壺彼逢郎於碧落此締偶於清都開蕊宮以竝出曳羅袂  
而偕徂指炎洲以稅駕醉風露而相扶爰化身於香海乃同  
候而雙舒遂使月姊懷儔星娥眷匹巫女朝來洛妃夜出覩  
交頸以興羨對駢肩而自失況複製錦爲裳雕璫作佩垂葆  
千行傾珠百琲鱗選蝶來翠雙鴛對冠百卉而不孤傲千花  
之無配乃有青鳥飛來雲母屏開鏡天不夜錦地無埃姿添  
竹樹香溢亭臺主人於是標綵旛布瑤席奉慈興晉芳液圖  
瑞卉於冰綃徵歌詩於座客客有頌辭請書於冊懿此嘉蓮

維花之仙玉質均麗頰顏各妍紺房百寶碧蕩千年以進金  
母厥壽萬千

味雪樓賦

井序

奉新節女宋婉仙澹思都監之妹雲墅太守之姊也工詩適  
涂生蚤寡獨居一樓顏曰味雪以寄嫺嫺之志圖而示人故  
爲賦之其辭曰

伊彼高樓有人孰處屈戌鏤窗罨恩網戶燕愴梁棲鸞辭鏡  
舞素幄孤垂朱絃絕撫懷逝侶而聲吞念重泉而哀吐悲春  
榮之長謝抱冬心以獨苦爾乃淒風瀏瀏斜月炯炯零雨春  
凍墜露秋冷儕臞骨於幽花鑒清胃於古井悲火燁而灰甕  
愁緒縈而煙永濃霧壓眉殘星弔影天靡良辰歲無芳景若  
夫元英晏序窮陰沍凝嚴霜晨積瘦日晚升握鈇鋸而炭燼

海蟾蜍而水冰屋有唳烏檐無噪雀手皸瘃兮素機停肌粟  
生兮縞衣薄雲雰雰兮下布雪縱縱兮紛落雪色兮皓潔雪  
味兮清絕盤露兮比甘山泉兮方冽若石髓兮雲漿類花英  
兮玉屑如醍醐兮朝灌如沆瀣兮宵咽嗽餘津於斷腸參回  
甘於鯁噎等蓼蟲之忘辛似冰蠶之失熱寄至味於淡泊邀  
天餉於苦節維嚼檠而茹荼乃名樓以味雪於是噉貝帙攤  
芸編疊怨什衍霽篇吸煙霞而運思咳珠玉以成言每續歌  
於黃鵠亦訴恨於哀蟬卑謝女之詠絮齊蘇子之餐氈粵有  
畫史繪茲橫幅繁糞攪空凝霤挂屋眩銀海之茫茫閉瑤樓  
之肅肅竹杪梅橫松根草宿山意捐青林容罷綠畱寒影於  
霜繚斯禦冬之旨蓄嗟乎哉歲華適盡氣候慘悽侯家燠館  
里婦寒閨忻戚相半豐嗇不齊雖感衷於蕭瑟或取慰於雙

樓況乎玉霰盈階銀光射牖曲徑聯蹤長廊握手遂或添香  
帳裏圍鑪屏後或滌鼎而煎茶或解裘而貰酒莫不快意命  
儔怡顏對偶伊淑女其偕歡荃何爲兮獨否朱顏兮易凋元  
鬢兮終白豔辰兮詎長暮節兮非迫景行門兮千仞懷清臺  
兮百尺食豐報兮後昆飲香名兮無斁

游情賦

眇眇嫋嫋揚揚楚楚託芳根於吳苑泛紅蕤於淮浦垂髻正  
緣小眉初翠盼輟光流膚融頰醉丹滴纖脣玉粲皓齒舉體  
便嫋雲行煙止於是錦舸棹風紅簾宴月履舄交錯袿裳紛  
列莫不趨香引佩伺影遺巾懼微誠之不達知冶意之誰親  
語東接兮西怒色獨授兮羣妬任素抱之所忻違淑歡而弗  
顧夢淺情淡愁長笑短委暗淚於金尊轉迴腸於玉瑄障團

扇以默憐背華鐙而私歛游情屏絕媒意銷忘無資信誓何  
申禮防滯錦翼於鴉羣掩芳叢於蓬艾將擇對而後雙固逢  
場而不柰俄而雲多月少水去山畱花中鳥寂陌上春收情  
途兮稍隘命域兮紛糾嗟佳人兮若此纏余心兮悠悠

貨園賦

并序

嘉慶十二年冬仲厲家吳中嘉興楊仁山觀察假以葑門別  
業前有小園廣止數弓亭池樹石幽勝頗具涉趣其間愴忘  
羈旅非必顧家名園甲乎一郡錢氏舊圃稱於後世若梁伯  
鸞之賃舂張元真之泛宅以此方彼此爲適矣園故未名名  
之貨園所以禠主人之明義識客子之暫跡也明年七月乃  
爲之賦其辭曰

有泚其池有蔚其林苔濃石黯草茀煙沈於是夷螳封而闢

徑拂蠶網而啓扉障風櫺以完紙塤甃堵以新泥列琴籍於  
西軒施几榻於閒窻其爲財也勿費故雖荒而易治客過而  
稱曰佳哉夔兮蔚鬱廓兮疎敞高非山而嶇吟廣異川而滉  
漭潁霞接其虛光清飈會其遙響磴懸升閣之梯藤引過橋  
之杖至其春妍冬秀夏蔭秋芬仰多棲羽俯有游鱗昏櫺駐  
曜曉洞藏雲珠明雨旦翠暝晴辰含態負音狀目聲耳曾不  
可乎殫陳有吟於旁者曰茲未足云也今夫吳會之繁雄金  
闕之華綺茂苑則歌吹沸天錦涇則脂澤膩水玉杯金盞之  
形寶井銅陵之侈書庫琴亭之備燠館涼臺之峙重栢複垣  
竟街連里疊疊累累莫可數紀規此營構未足當其陰陽之  
一隅宅旁之棄址余曰唯唯否否客胡爲者斯宏農君之所  
患假奚煩爲鄙人夸貶也且夫物有等差數靡常久平泉離



垢判地則竝彰茅堂梓澤過時則俱朽轉窮廬爲豐屋變藻  
高而褻牖旣創之而或乖亦因之而難守矧一椽而一石匪  
騎士之所有然幸懸冠於大樹託足於高阜矣大不爲廣小  
足閒居山情野興爲適已踰客有未悉請述其餘東則尚衣  
之局支茜之園鼓角時聞遙而不喧西則長洲縣解隔離百  
步更邏宵鳴莫審其處巷不容軒門非近市鄰無惱於鵝鴨  
塗不穢於羊豕幽閨遶窻寧神便體爾乃奉潘母偕萊婦兒  
稚熙熙在左在右零芳叢桂攬秀榮桐蘿陰候月松下披風  
邀花低幹探果陽叢鳥聞聲而霍繹魚見影而噉喁或乃素  
侶閒過勝流駢至散屣茗餘舒襟酒旣縱江海之逸談商文  
辭之奧義訝庾韭之非貧忘楚車之爲貴和不徇物直不忤  
世弔詩老於滄浪景達人於鱸膾旣假息於斯園聊逍遙以

萍寄北垣之外水仙之宮雲起荃壁旗颭靈風云柳生之不  
第儻洞庭之女龍諒遠遊之同感必大庇於寓公噫吁乎  
霽兮松楸浮家兮遠域咏黃鳥兮愴膺誦緇衣兮志德蔡  
旻  
簞於荒亭伍挾簫於市側苟烏哺之可謀雖鳩居其何忒念  
天地兮遽虛感往昔兮斯須孰爲逆旅兮孰爲鄉閭孰爲暫  
處兮孰爲恒居流逝坻止兮迷不問途雲飛泥沈兮焉知所  
如

同胡果泉觀察遊羅浮華首臺序

羊鄒洽趣登峴首而紆懷王謝儼蹤造臨安而取暢伊古賢  
達類耽昇眺或乃吳船偶泊見佛我眉錢幕同遊探奇少室  
發清興於暫遇寄遙情於一覽岩花識面山鳥知名斯亦足  
矣若其膏肓泉石草芥貂蟬務開徑於始寧必窮幽於靈阜

孤襟逸躅未暇講也羅浮雄據炎裔佐命祝融陽烏拂其顛  
洪波濯其趾割蓬萊之左臂通句曲之右肩夸娥難負巨靈  
莫擎固已著崇於正編標異於奇牒矣至其羣峯蓄翠古洞  
藏耀竈騰丹炁宮鬱珠輝洵神秀之爐冶仙靈之窟宅雖秩  
讓三公而名高五嶺焉緣締夙世神觀歷載客居在近我勞  
如何觀察使者胡君筦攝奧區經營勝賞金城擁節難枉問  
俗之車珠海回舟正伐祈年之鼓獲偕英侶始修靈約蘭橈  
整輟筭與雙駕乞雨華首之臺薦香螺髻之座方之管人事  
以勤矣因之濯纓汎濫脫屣巉巖尋前盟於白石結來願於  
丹梯於時倏蟪蛄欲出乖龍遠藏原草殺青溪雲釀赤邨無孕  
萼之媒路有零英之菊銳行竟日始矚叢椒嶺陽醉山涼颺  
扇樹林交徑黑石峻磴危松明傳火目眈珠燈蓮漏催鐘耳

鳴神漢迷途數問古剎斯達玉犬相吠金雞欲唱矣爾乃僧  
供蔬筍月在煙蘿借蒲團以寧勞偃藜牀而證夢於斯時也  
四百峯巒三千世界皓眉老叟放舟楫於袖中長髯道士貯  
煙霞於囊底高揖桂父平視芝公鳳子星攢引入葛仙翁之  
宅龍公玉挺來自黃野人之廬恍接袂於虛杳俄寓心於元  
化道流倏散清寐早覺懸鈴風語匪翠羽之啾嘈陰厓草偃  
是啞虎之巡歷織烏已上孤青鬱然紺殿倚乎峭拔寶衢露  
其窄倅禪扉半敞佛躡同踐濃露沾筇溼雲襯履趺坐於合  
掌巖下掬飲於洗衲石邊泉瀉天池水簾挂壁澗穿雪竇花  
雨糝流五百羅漢誰爲我相三生曇彥詎識前身矧乃上界  
三峯山中十洞秀惟少曉幽不盡絕念茲遊也毋乃略乎然  
而俯仰奇觀去來霧境留中雲夢君何減於相如壁上巫衡

僕將擬於宗炳誦梁王之舊銘希康樂之小賦江煙蘸筆山  
液濡牋寄彼支郎永之蕭寺

重刻楊太真外傳後序

記曰內言不出於閨闈宮掖之嚴奧者乎然而瑤臺怙寵夏  
紀足徵玉杯荒宴殷鑒斯在周傳藏櫝之天秦洩守宮之禁  
若乃元靈仙曲宣自武皇倉琅童謠錄於成世兩京以還六  
代尤炫瀉鹽沽酒之祕辱并迷樓之談莫不炳記曩編標奇  
別簡奚必彤管旁書金樓自述始以徵信乎哉余遠祖職方  
公所竊揚太真外傳二卷蓋其例爾彼其作儷桂宮升名椒  
帶玉璫未贊瓊佩遽膺犯籋條之刺竭脂澤之奉外戚則武  
安當國中葦則辟陽被幸卒以龍阿倒持狼狽反噬騰埃輦  
道血及期門豔嬖之由彰聞海宇乃或赤墀操管時有諱辭

金匱紬書專論體要於是漢書明如班史莫詳而稚川補記  
魏迎薛女陳志勿載而子年拾遺軼事無稽色荒靡戒亦記  
籍之漏掌故之闕也且夫儉懿之典每淡素而罕傳奢麗之  
聲則新奇而易播故開天之際遺事累書傳信復纂雜錄有  
作良假有傳梓史臚其舊聞敘坊筆其碎故凡皆韋劉所疑  
歐宋所略撫纖拾墜端賴衆編雖傳聞異辭咸資考鏡公去  
唐未遠彈記洽聞鉛槧盈家必有依據顧列之說林未登史  
庫紙墨將替梨棗弗新其雲仍之咎矣爰屬友人袁君又愷  
覓鈔善本江君子屏校而刻之藏匪文通借從次道雖愧雕  
龍之裔庶同辟蠹之方焉

座主陳夢湖先生歷陽典錄序

荆楚歲時岳陽風土武林舊事中吳紀聞景書舊於襄陽稽

方物於益部莫不有資紀牒用附職乃至如記號嵩山志名  
澈水仰藍楊氏之編草木嵇含之狀名園特誌於文叔水利  
專書於季隱皆輿地之分篇史家之旁例考其撰著半出鄉  
賢然則表識粉榆恭敬桑梓綱羅故實薈萃根條補檇乘之  
闕略備鄉邦之職志尤賢豪之務文獻之義矣吾師陳夢湖  
先生歷陽右族 熙代鴻儒萬卷撐腸九州指掌攄華粉部  
天垂白雲司命文昌人瞻紫漢方其家居廉讓心對古先念  
閭史之叢殘感圖經之哀朽開山曠水考厥名稱軼事遺文  
遇諸簡冊太冲著戶之筆有句卽疏白傳投瓶之藁靡書不  
采猶復訪之故老證以舊聞日居月諸注錄斯備於是鈎金  
片玉積瑤匣而皆珍碎錦零縑經鍼神而錯采地理之事莫  
悉於慰祖人物之志允屬於倉曹彙爲斯編非偶然也夫歷

陽喉吞江漲臂接淮流東梁西梁峙爲天闕大峴小峴壯若  
邊城歷牛渚之重淵迴烏江之駭浪自其縣由秦置侯經楚  
封歷世爭桑梓雄飲馬規形度執實巖疆乎乃若桃塢花飛  
楊林雨歇日長風古巒秀川明遂以發杜默之豪譎動袁宏  
之高詠文昌振藻紫微和鉛靡不氣壯虹霓聲洪金石賢喆  
輩出風流相望乃江漢之華州東南之霧圉也至如白石洞  
天華陽門非羽客化人神居仙宅遲遲在焉斯其餘已比者  
昌期普晏百有餘年兵氣銷沈地靈鬱發衣冠之彥誰起著  
述之才虎奮然舊志闕如纂修莫繼豈其不逮抑未遑歟斯  
編類次門分裒然盈尺其首序沿革也千回百改無煩巧歷  
之推古鑿今朱有若良工之績其次臚職官也歷政之榮齒  
諸司之金銑符節雖遲而文化式彰旌幢旣移而武功義續



人物則璇源玉水見鍾毓之瓌奇菽文則雲謠星稠徵蒐羅之廣備自餘四例固不精詳比齊乘之淹貫異刻錄之怪澀方之舊志增損竝優若巨浸之滙細流茂林之芟叢莽後有述者舍此奚循鈞面牆爲慙擿埴是懼學非秦宓難張廣漢之談對謝朱育詎副濮陽之問頃以辱在匠門命爲嚶引承茲寵逮矣肆詮評雖豹斑之略窺等雞跖之屬鑒良以志慶敢曰文乎竊維先生稟盈冲之秀應清怡之運方將剖竹兼圻建牙廣土輜軒泣止更成風俗之通簿領餘閒會輯虞衡之志其它製作奚翅等身今之此書其猶一鱗片甲乎異時珂里縣車戟門頤素楊侯鈞遊之處都人將鄭重而談顧公讀書之亭郡吏以流連興慕續之簡末更爲華已

廉鎮吳曇繡先生榮性堂詩集序

丹崖負日弱足難躋赤岸暨天昏眸莫矚舉龍文之鼎孟說  
斯裕彎誰血之弓由基庶巧挾藻吐韻厥類於斯大雅旣歇  
繁音代奏風會所臻體製備矣機杼流傳爭裂錦繡江河泛  
溢競鼓波濤假非振奇曷克自立然而鯨呿鼉擲或駭於山  
林雷震雲濃莫施於廊廟雖稱破壁終嫌躍冶未能握紐詎  
足扶輪至乃雌聲元子恨似司空俳體枚生愧儕園令斯又  
蟲號蟬噪狐穴貉邱者已才麓非大體弱非精不欲囊中之  
處終爲籬下之寄所貴母元氣祖葩經庶幾曹劉牆峻無慙  
入室李杜壇高可容樹幟矣乎曩繡先生雲生岱嶽日浴咸  
池著作充棟詩歌獨步傳延州之雅樂埽江左之餘風縱橫  
海內照耀天下阮生咏懷之章謝公紀遊之什白傳采風之  
製王粲從軍之作沈博精麗獨憑天構魁壘煜燭胥納正軌

求之曩古雖笙磬同韻而球圖異觀良非力敵門虎氣攝馴  
象枕肸羣籍佃漁百氏弗抵斯境所謂揚子雲文之烏獲左  
太冲賦之張衡者歟夫蠶叢旣闢力士斂手龍門已鑿神禹  
遵塗而復峙蓬萊以立崇山源星宿以成巨浸豈非乾坤清  
厚之氣獨鍾而獨受宇宙巨偉之觀愈出而愈奇乎哉鈞衡  
盧賸塊章貢細流飲少陵之詩肝腸未易念賈島之佛文字  
無窮野鶴孤飛鳳皇羞侶低驚四適騏驥懶顧車前一拜欣  
慨平生扇底數言頓增聲價然而不讀五千卷難登岐叔之  
門非負八斗才敢踐陳思之席是知獎訓無倦林宗之盛節  
容接有光慈明之榮遇也示茲宏集命綴小言雲漢自昭管  
籥何當六丁未攝允爲席上之珍四海盛傳難作帳中之祕

金手山三李堂詩集序

越吟敘哀楚騷寫怨漢製魏造多慷慨之音齊謳梁曲極悽  
悱之致由來遠矣若夫正始明道乃雜仙心孝穆蘭成特傳  
豔體繼白雲於姬滿取彤管於風詩固賦客之閒情才人之  
逸興也吾友金子手山珤鏡在曾煤花作骨家臨虎阜之石  
少飲鶯湖之水馬嘶春陌空騁燕臺絃斷秋琴復充秦贅爾  
乃仰呼明月俯對落花聞斷雁以思鄉坐斜陽而弔古裏人  
孤館暮雨聲聲送客離亭遙山點點葢其青衫一領白屋數  
椽蹭蹬窮波徘徊前路譬之娥眉未嫁中筵斯悲燕領不侯  
弓刀自嘯秋士有心故多感也若乃畫舫尋春紅簾送夕綺  
羅雜坐則臣心最歡絲簧間作則余懷少慰華堂酒半歌女  
解顏閨苑花前羣仙拍手亦往往而有焉於是搦管微吟凭  
闌高咏憂端蘊結則振藻於楸梧綺思纏綿則舉芳於蘭杜

或神寒而氣激或骨香而姿麗若三李堂詩集若干卷固妙  
臻斯境已僕恨埒文通愁齊平子鷄鵠不樂於鐘鼓鱸鮑相  
忘於江湖邇者吸履蕪城接裾賓館愧賈生之年少驚叔寶  
之神清跡雖疎於對宇氣已洽於入室辱示茲集命以題辭  
夫匠石運斤郢人使之斲鼻嗣宗舒嘯孫登因以發聲君固  
然矣僕滋慙焉然而睹夷光之面眇者知妍歌激楚之曲聞  
者稱善僕雖不敏曷能默然維時素霞春飛銀釭夜燼披展  
不去于手賞激惟愜于心連篇則琮璧相輝摘句則龍鸞獨  
舞鐵馬蕭騷之際忽響金鈴璫簫要妙之餘仍吹畫角豈非  
軼羣之才嗣古之製者乎輒舉所知擬議云爾

吳退庵菜香書屋詩草序

春綠未枯秋紅正絢風霜相洽雲月時來葢客居之勝概也

余與退庵同年花南接席桐下披帷擊蕭鉢以分韻擘薛牋  
而訓句或軒眉於酒半或粲齒於茶餘神契旣深心賞非一  
會君哀集付鐫徵辭爲引輒疏其所見還以質證焉君深情  
煙舉曠抱霞張意往而冰雪融機赴而泉源沸方千織字早  
得於龍梭沈約諧音豈煩於牛鐸列代體製衆家標韻允能  
探其積石自得濠梁者矣爾乃攬秀銅陵搜奇石室觸牒初  
佩解緋銀豪巾衫未青私裁繡段瑤章日積香譽四騰與厥  
弟白庵齊名盱江二陸皆躍雲之龍而平原先步兩到若凌  
寒之竹則茂灌早拔是時前徽已謝後俊未登雲旗靡然雷  
鼓弗震乃遂填箎互唱花萼成編斯爲難哉旣而遊屐遠蹈  
朋簪廣羅弔古招鄴下之英高會集山陰之彥燕臺梁苑徧  
陟吟壇楚樹吳雲都成墨彩會心不遠則魚鳥親人放眼無

窮則江山助勢譬之皋蘭屢磨戈鋒愈淬波斯久市寶匣彌  
充何其盛也然而衣空貼月帽未簪花羅橫以不第減名馬  
周以無官作客渴驥寒後之悲壯曉烏宵雁之淒清遇之窮  
矣詩亦有焉今元髮俱變青鞵將歸成式苦連徒傳於梨棗  
王筠真賞豈望於風塵抱荆璧而傷心投隋珠而怒盼嗟乎  
嗟乎豈獨退庵然乎

賞雨茆屋詩集序

詩至於今夥矣盛矣操觚之士列韻之徒人自握珠家咸享  
帶雖華質殊尚豐約異觀類欲雄畋末流高掩前喆羅八殢  
以喻廣引四瀆而比深窮變於品彙撫奇於幽怪然而五章  
飾采色分正間六律宣音聲別雅鄭燭龍縣照而熠熠亦逞  
其光雕虎炳文而狸狴或侔其貌乃至時工縱削而般倅舍

斤佚女弄姿而施奴斂衽往往然矣語其機杼內操規繩外  
立鬱爲文棟蔚爲詞宗者蓋未云數覲也賓谷先生蛟龍入  
裏星辰在手條貫列代包絡羣才自螭坳獻賦鳳闕陳書固  
已并藻木天薰香粉署洎持函籙出理牢盆立縣蕪於淮東  
主敦槃於海內乃極一時之盛焉夫以綺歲振纓華州建纛  
而簿領少暇卽事縹緲嗜好俱恬獨耽嘯咏吮豪官閣盡日  
簾垂壁楮賓筵中宵燭燦非神悟由天英傑命世何能若此  
者乎當其意牽今感觸古悲精思默運則雷電無聲神機  
驟來則弓刀自躍遂以吐納駢雅驅埽齊梁骨壯聲沈情辛  
味旨其蒼涼婉鬱馳騁偏反誠浣花之遺軌玉局之傑構也  
間爲清峻之作時出流麗之篇能事非一餘技而已夫豫章  
千尋斯有翻風之勢餘舸萬斛斯有截海之能菴蘭軒芋莫



壯於平林蘭漿蓀橈詎勝於巨浪是知才崇者力肆氣盛者辭充加以心穎密拙言泉細酌所以綱維眾製締造一家者矣釣願魚無網亾羊補牢薄遊蕪城久依蓮府寶鞏附蘭亭之唱常用爲慙鄧魴喜香山之詩差有所見頃者辱問弁言不獲命輒竊其緒論佐以妄談若夫東野苦吟借韓名爲重宛陵窮句待歐序而彰它日拙集裒成願以傳斯例也

郭頻伽邗上雲萍續集序

余識頻伽始自邗上於時嘯侶高參綺裳佳日遇物賦韻寫懷命篇其後余暫南還頻伽再至訓唱課夏羈旅感秋驅墨箋牋復成斯集以示余曰前集廿亭序之矣此以屬君宿諾爛年乃獲報命頻伽之詩霧摠怪發骨壯氣雄力徹寸豪勁於築蹈曾有羣籍瀉若奔濤牢籠品物濯辟精利綺靡波峭

亦邁時趨自弱迄彊成囊累軸栞行遠邇推誦翕然斯集之  
詣有進無退不復云也顧其名集乃取雲萍且續名之良足  
歎歎夫雲出於山虛而無泊萍泛於水渙而難聚其或東隅  
西嶺因風暫停北渚南澗隨波復斂殆偶然矣嗟乎士貧而  
遊朋遊而合其爲緣數寧異此乎頻伽少歷江淮繼遨京闕  
疎狂自放困抑弗慙雖復摺紳接鄰名宿傾衿而解衣懸冠  
鮮逾寒暑雲萍之似豈惟邛上以邛上例之耳然而月觀風  
亭雖空瑩苑黔笑者萬族稅車者千羣熙熙攘攘煙消塵寂  
西路歌吹畱聲杜牧之辭東府丹青增色王褒之贊足知文  
字之壽雖暫而永風雅之跡逾遠不磨已桃梗一情蓼蟲其  
味放言其情竊比於蘭吳矣

墨波堂詩集序

詩之有唐若長蘆之屬序唐之有盛猶溟渤之滙流顧襲貌  
非真變聲或戾優冠伎曲異獎同譏夫霑杜陵之殘膏要非  
鳳髓棄太白之遺杼亦尠龍梭誤服還丹冥行廣術燕石自  
寶鵝冠不衷均爲舛矣故義存復古功在愜心扇鑪冶於霏  
曾召英華於巧擊過啼猿之峽匪徒悲感之音登落雁之峯  
別有呼吸之氣迹離神合格古趣新乃其優也吾師夢湖先  
生墨波堂集若干卷璵骨先胎元珠在握心趨正軌力挽積  
風因高以植基練精以拔隊江有波而不險山未雲而已奇  
所謂得其環中遊於象外者乎興會所臻體裁各協宮苑則  
樓成五鳳關塞則箭落雙雕壞宅荒陵古魂嗚咽奇山秀渚  
逝景淹畱以至感遇酬交陳風紀事莫不金華玉樸琴靜瑟  
希不倂規而改錯匪乞靈而假寵洵開寶之汰嗣當世之鴻

筆矣蓋其擗腸卷軸盡赴牋豪過眼雲煙咸供驅染加以心澄止水志絜秋旻眎簪紱爲韋布等郎署於邱壑緇塵雖汗而玉屑常餐叢莽雖蕪而瑤草自拾斯所以清風雅之源樹篇章之骨者也乃茂陵賦草邑人鮮知射洪文軸都人罕覩昌黎聯句專屬於孟郊魯望唱酬多因於襲美豈不以雌霓惟王筠解讀雕龍無沈約能賞故韜華祕采不欲輕播歟屬以鈞附近朱藍比於沆瀣示之全帙且徵序言受命以來罔知所應爰乃朝披夕誦句釋章尋雖略辨津涯終迷閭奧聊就所及肆其妄談魯劉舍人有言操千曲而後曉聲觀千劍而後識器鈞之闇陋豈其庶幾嗟乎不舞之鶴理翮已遲將歸之鴻留聲易歇會當戢影巖壑輟轡林垞東堂渺侍坐之期元亭隔載酒之路斯集旣出願寄山中匪惟什襲於香綈

庶獲師資於玉律

宗室輔國公思元主人詩集序

思元主人抱璠璣之質揚蘭茝之華妙擅九能名收兩絕公  
退多暇尤耽吟諷壽梨棗者葩流充篋衍者綺疊伏承相示  
受而讀之覺其靈杼因心洪縻在手儀古遺貌融今取精學  
靡專師才兼衆製譬之歐冶鑄劍合銅錫之英淮南和香渾  
沈檀之氣金缸壁帶複殿交光火齊屏風織塵畢隔請力所  
臻遂如此乎矧其崇巒增峻神瀆加深綠當夏而彌盛碧凌  
秋而愈潔精進不已疇能度之夫長庚降曜厥在唐宗太乙  
分光是因劉族彝彞妙繪氣逸於孤山子雲工書聲流於百  
濟是知雲以高而采絢鳳以貴而毛奇水精之盤非常餐所  
設火浣之布非素機所成也

史補堂詞序

管子雲好賦鳳出肝腸承吉苦吟花生口吻文潤而茂陵渴  
詩豐而吳興瘦思泉曰湧精舍故搖軸瘠由輪石穿以漚直  
其然乎然而英流溺學粹掌猶勤文士狗名忧心不悔振古  
同癖蒙亦希焉頃吾友補堂厲書告疾竝以所著湘頌樓詞  
及都曇別譜索爲之序發緘神駭掩卷氣索瞿然曰嗟補堂  
瘁矣推其原始抑詎有異故歟蒙旣內訟敢爲隍引君才擅  
衆能學求兼勝秘抽妍騁必奪螯弧技角材呈皆跳刻竹夙  
耽按樂尤善倚聲祖梅溪之織綃師石帚之縫月旁參羣雅  
不囿一家纏緜則絲竹諧情壯浪則金革儷響歌風弔月春  
物豔而含悽嚙蕊吐芬蕭辰械而改媚言霏玉屑字成珠綴  
豪宕幼眇淵乎麗矣蓋其性衡天通情源仙導少得幽燕之

氣長歸吳越之間窮躅海隅抗志煙表仰空光以神竄觸古  
悲而睫漬高樓暢覽仲宣以之愴裏清歌悅魂子野從而發  
歎於是柔豪刺臆銳甚刀錐子墨磨肌損逾砂石愁縈素絹  
無非刻意之章怨拍紅牙盡是傷心之曲所以銷鑠襟靈絲  
縷牀席者也猶憶放棹嬉春燃樺卜夜酒在尊而興逸月臨  
階而心遠閒評古調宮徵雜鳴暫摭鬱胷哀樂相半賸翰所  
萃彌復萋菲惜無紅豆記譜碧玉轉喉而已松陵簫去瓜洲  
遂發悵今懷咎邈若仙塵幸乃孟蛇解疑牀螳息門康復不  
遠追懽攻無數耳茲編病中手定將壽棗梨斯孔翠之惜毛  
實麒麟之見角凌雲激賞竝世已多霖雨傳操後賢其領所  
望維摩疾愈勿著天女之花仲祖身彊更味荀郎之水悉屏  
結習永葆大齊蒙方白箴亦以當枚叔之發

擇堪錄序

采湛蘭於晏語誦伐木於周詩襟尚旣洽手足何間是以關  
中壯士有弟畜之交單父賢宰有兄事之友雖復睽影千里  
阻音十霜心鏡不違耳雷自貫況其欵聯犀塵馴擾龍鸞會  
文輔仁分甘其苦者乎今此交慶略可援述或芝室素芬或  
韋贇初佩犁來相語則莫逆於心山阮同遊則忘言著契酌  
處季孟之間永定僑札之分非必信旌白水盟藉丹雘始有  
翕羽之助投膠之堅也於是江樓薦觴湖牒彈絲指鳥喻懷  
抱松談操雨未歇而筵竝星已稀而襪接竹西歌吹之路春  
暮煙花之月晨夕無期哀樂相雜譬諸樵馬失羣則嘶亦猶  
縣樂合聲乃奏公叔貞孤仲翔寂寞非所病已旣而孔璋南  
邁偉長北徙僕以噬指心動覽圖意惻驟分雷劍暫輟牙絃



謂廣陵者數君子耳元亮感咏於雲停仲宣愴衷於雨散以  
今賦後羌有同情雞黍結言良云不爽鷗鷺狎迹豈謂偶然  
見雁陣而天遙聞雞鳴而室遠異時山寥水寂月黯冰寒追  
念後遊曷殊短夢臨岐泚筆茹歎抒辭疏記姓名竊比金石  
之鐫貽示似續亦如縑緇之弄墨子曰必擇所堪茲可謂擇  
堪矣因以名斯錄焉

酒人觴政序

代

觴政之名自魏文侯命公乘不仁始也顧嘗推之其來遠矣  
周人禮飲較射投壺衛武賓筵立監佐史齊晉淮澠之談秦  
趙瑟缶之會大夫賦其鵠奔舍人畫其蛇足掌觴揚觶胥其  
義焉厥後賈逵有酒令之作皇甫著醉鄉之編旗旂閃摩法  
已靡傳鉤戟潛虬名猶在指以至三橫兩縱之辨火炎土圭

之對尺八空喉之謔口斗川椽之形頗徵文史亦資口給匪徒拳握松子袖拂骰檠畫鼓傳花牙籌插碗而已古之勝流八斗有程百觚不亂止籃輿而無訝對車騶而自若或以草元或以讀騷染翰綴辭判牘決法此直以酒爲名其醉不可及也若夫坐無車公人非劉昶庾闡捐瓚旣苦向隅灌夫行觴或嫌罵座醉龍害馬病葉狂花雖喧寂殊科而忻憚一致將使清聖濁賢見辱於俗父白墮綠酈名譏於狂藥進退之用庸可已乎今撫拾卮言折衷酒譜繪雜宋之戲仿九射之格總爲一冊命曰酒人觴政用襄錄事比於班條旣平旣均不苛不濫戶無大小咸以陶陶故知歡伯酒名滑稽酒器義取酣適不害談笑至於嗤戲形貌嘲謔姓名戰拇紛呶搏髀跳盪有乖和雅竝宜撻罰庶令酒星加朗醴泉增味釀王雲

雲苑生鳳雛

宮保百菊溪制府平海投贈集後序

遼夷鯨渚永靜狼烽露版晨飛琛舶夕至瀚積歲之深惡憚  
繼慕之威稜此之壯猷厥惟元老允宜建碣神邱立碑碎葉  
紀常載帛銘鼎勒鍾以炳膚功播於來祀矧乃門生笛曲軍  
吏饒歌賡姬和東山之詩述召公南海之績壽諸簡牘其庸  
已乎此 宮保制府菊溪先生平海投贈集所由刻也粵東  
地瀕天池道通月竈萑盜嘯聚莠民逋逃進則鯨飛退爲蛟  
螯偷生狡逞歷有年所環海官軍偶人而已惟公重膺  
帝簡總制茲邦儒帥先聲神方默運牙旗十二布列霄漢犀  
角三千周陞要害內絕齎糧之應外張截路之師戎政一新  
士氣百倍其誓我軍也則先登者賞返顧者誅其令賊黨也

則順又者生張弧哲戮斯實制勝之要式遏之源厯政因循  
未嘗講也爾乃風雷震前雨露沛後隊吏用命精士忘軀批  
亢搗虛窮鱗竄感遂欲攸關請吏棄仗輸欵而疑者謂詐怯  
者云危眾議沸騰公曰否否以爲勦除者用兵之渙號撫綏  
者弭盜之本怡乃單舸出見諭以恩威兩甄遽收安其反側  
既揚

聖武復布

皇仁貸困獸於網羅蓄鷙禽於韝臂於是恩循威奮請効顏  
行側貳懷誠願充果毅時則西路殘孽尚係遊魂降卒先驅  
竟禽酋首斯尤達權之奇略使過之妙用也是役也軍有喜  
氣鼓無退聲傳箭外藩揚帆絕島火人飛焰則毛面盡焦劍  
客挺鋒則妖腰立斷內渠旣縛羣醜悉俘駢首橐街封骸京

觀兵不淹晷民不遺芻頓使積沴全消重溷以肅夫受降則  
如彼勦賊又如此雖復單騎回紇五月瀘江方之今段茂以  
加矣非厥義璜璜厥度汪汪其能信及豚魚化漸蜃鱷收倒  
戈負弩之效乎非智達三隧心如四時其能抗颶虓虎跨斬  
長鯨若撥麴沃雪之易者乎自鎮將失馭衙兵養癰懸胃戍  
樓卽稱備寇藏舟近壑乃謂追奔或利苞苴反爲間諜以故  
屯繡恣蘓魁蠓橫行掠龍戶於沙頭泣鯨人於泉底毒霧四  
塞冤霜久凝不圖快心遂有今日然當建策之始決機之會  
愚夫眴轉懦吏悼惶傳蜚語而數驚造謗書而中撓逮短簫  
唱凱羣口始暗故人知聚米之奇莫知斬絲之斷知籌筆之  
勞莫知爍金之罔且知除蔓之務盡亦未知耨苗之多利也  
天子嘉乃殊勛用頒懋賞錫之圭鬯冠以貂蟬

優詔頻仍朝野相慶恩莫厚焉榮莫加焉今收簪五管轉蘇  
三江彼歌去思此謳來暮屬以馮蠡失序殫慮茨防鴻雁告  
哀載馳騶哄勤同劉晏勵荷畝之心勇埒王尊奮投馬之節  
以臻俾乂以召休和卽兒河平有同海晏所謂非常之事必  
待其人應運之才靡施不可者歟鈞少希磨盾而學昧奇脗  
長思執爰而力困超距事毛錐而安用讀羽書而太息然傾  
風囑斗以日以年茲者幸託龍門獲披鴻帙敬因寵命附綴  
璣言竊維首唱十章義尊旨遠音繼雅頌事包檄移而噉曰  
懸膚春膏在握煒煌洪恩照楮溫豪終景宗宴吟問何如去  
病慶之裁句謂無愧千房率爾之談有光曩史況於文武兼  
資助名蓋代敦詩等於卻縠雅譎過於祭遵可不書以金管  
登之玉冊乎哉若夫餘作承流咸飛壯采星稠綺合滙茲巨

編亦足證乎輿論有裨於載筆矣

汪西谷布衣紅木軒山水篆冊後序

游絲溯秦硤玉創漢銀黃殊質朱白異規印章代燼由來非  
一顧官爵之外惟鏤姓名氏號之餘閒及軒館未有珠岫珞  
岑紀於花乳之石璠詞藻句炳以蘭金之泥者也黃山布衣  
汪西谷先生抱泉明之節懷尚平之志身行萬里神周六虛  
雲嵐滌智珠璣唾篋乃復蒐奇金石遊栽琬鏤精研六書追  
蒼史之逸軌妙講四法掩文何之近名勝流推衿賢士傾褚  
幾於一字數縑片石尺璧故將舒嘯岩壑絃詩澗林殫幽險  
於區中寄沈冥於人外俯拾援果莫代春糧仰攀鵬巢曷供  
蠟屐則樵柳葉之篆萍菊花之銅手擊暫勞囊橐以具遊資  
既給千金弗顧矣管君平賣卜志在百錢桃椎織屨意存斗

米今之高韻何謝二賢晚歲收蹤長安徙宅邠上劉虬臥疾  
思暢餘陰宗炳就衰彌懷舊蹟於是吐五岳於胷臆爭千秋  
於簡牘鐵筆與竹管齊揮芝泥其松煙俱煥朱經墨緯萃爲  
一書四冊八篇奇勝備列桐城相國序而刻之堯章集古之  
編君實遊山之錄彼爲專述此兼有焉惜六丁見攝三篋遂  
亾惟黃山一冊畱貽來許天都黃海奇觀斯在容成浮邱仙  
躅可接意者梓桑結念靈爽式憑故同厄良蟬獨出灰燼燬  
庫德藝竝成通介兩得先生之意寧第區區用啓後臯益宏  
著作耳良苗嘉穀亶其然乎

江鄭堂詩序

吾友江君鄭堂辦香高密嗣音禮堂通經之儒也枕藉七略  
吹斂百氏方聞之士也蒐考彝器校釐逸篇汲古之業也鉤



元於怪牒博趣於璣談搜奇之能也凡此於學則貶喪皆與  
詩畫境故匡劉之屬無與風騷陶謝之倫不涉訓故豈所謂  
華樸異尚巧質殊科博識有功絢采無力者乎今讀鄭堂詩  
一雪此言矣君詩葩流雪絮泉吐玉鳴汎濫而循涯馳騁而  
遵路因椎輪爲大輅易繡悅以輕縑鎔裁通變自成馨逸雖  
曰餘技殆掩專門蓋其寸管之蓄蒸爲煙雲三壁之津融以  
月露邊笥陸廚之藏不以礪詩囿周鼎秦碑之字不以綴吟  
豪用能性蕊秀敷辭條蔣蔚餘響於簡外寓遙旨於墨中  
可謂舒文載實浚波討源符言志之規契緣情之論者已夫  
魏舒角射鍾毓彌驚孫登舒嘯阮籍自失知之弗盡良抱咎  
慙嗟乎學旣漢聖詩復唐賢加體貌魁碩意氣軒翥允宜蜚  
華秋賦翔步春明羽儀乎昌運潤色乎洪典而名困巾褐力

彈齏鹽棲屑靡遑輒軻未已才之厄歟命之嗇歟何其窮哉  
僕焯掌不勤糞心無獲於君無能爲役也特其堙暖不殊嘯  
咏相洽遂辱以嗶引見屬亦遂不敢以糝導爲辭譬清露灑  
枝蟬飲知味秋颺拂草蛩聞發聲匪稱賞音氣合云爾

香遠樓賞雨序

嘉慶壬申七月二十八日大司成吳穀人先生六十七歲初  
度兩淮轉運使者廖公治具名客稱觴於梅花書院崇德尚  
齒之義尊師萃賢之禮於是具焉甚盛節也院有香遠樓高  
竝麗譙俯臨平楚是日輕颺饒暑佳雨滌塵氣滋松篁聲滌  
膏玉榻掃而雲布簾開而燕來花盈盈以睇窗泉泚泚而穿  
砌折荷爲笠釣人欲歸覆犢以蓑牧子猶出東望杳靄則海  
色近眉南囑空濛則山翠承袂於是芳醪載啓華釭繼張主

頌維祺賓歌既醉皤皤元長于胥樂矣夫雨以餽致比上詰  
之餽神雨以化名象君子之化士矧乃津條爲瑞破塊不聞  
清如露溥沛若川至將以溉菊酈水潤芝商山以表岱石之  
能以驗傳霖之蓄豈偶然乎海寧陳君受笙因爲寫圖用畱  
勝賞鈞幸獲從諸君子後乃敬識其繇焉若夫先生稟南極  
之精負北斗之望耀文章於緯度養福祿於煙霞朗月照我  
春風風人嶺頌咸臚無資贅述

白雲寺讀書記

余婦家王氏居東鄉之黎墟有山巖然曰白雲峯有屋歸然  
曰白雲寺是山近走金禪遠導白馬蓋源於武夷矣厥狀肖  
舟尾有柁石元氣爲海載以浮沈太虛無涯屹焉止泊累世  
以前有白雲上人嘗此卓錫山乃受名或曰否也僧以山字

舊石鮮剝莫可考。悉寺左精廬一區廣逾十笏。林叢慘翠。煙  
露蕩沃。外舅癡山先生謂其幽阻修息。惟宜己酉春仲。館余  
於斯。王李二君。攜囊來伴。嚶其鳴矣。足破闌寥。松枝埽梁。棊  
根拄榻。承瀑滌研。映旭陳書。晨靚新函。夕披故帙。課有定程。  
製靡恒體。餘力弗等。任意所臻。佳月矚窗。輒思吐句。過雲拂  
席。忽擬臨書。橫簫孤吹。初不相和。文楸對奕。聊以節談。風無  
停聲。雨多遠勢。旣會吟吻。亦浹霸襟。松門之外。雲路無際。遙  
岑紙薄。貼天欲飛。平疇罽方。行人失影。是時元鳥旣來。紅英  
雜綴。竹多筍密。土潤草肥。椿芽正紫。槿花純白。燒以枯柶。煮  
以濫泉。脆齒芬頤。致有禪味。池鮮可釣。時復腥鱉。酒脯儲侍。  
間日一設。己而夏溽漲。溪樵蘇。裹足瓶粟。適罄竟日。腸鳴俯  
窺。來徑仰睇。漏天洶洶。其波浪浪。其雨始亦憂歎。頃還嘯咏。

水落得餐巨壑填矣出緣巖壑捷比猿猱高扳薜蘿涉及巾  
履山高市遠僧少客稀游女時來禮佛而去荒寂之境幽致  
爲多蟲繭黏壁蠅破而飛雀食墜階螳逢而運纖形璣趣閒  
領故深候歷十旬樂非一狀蓋誦讀之暇惟取於適情飢飽  
之謀曾不以牽慮也屬有試事遂成解散今貢太學將首征  
途向秀入洛竹林之遊暫虛張翰歸吳莼菜之羹故在然而  
華年告易人事莫齊逸興與蠹簡俱灰芳蹤逐馬蹏其歇前  
塵渺絕如何可言暮雪墜門寒鐙隔夢操觚覲纘敬謝山靈  
竝貽二君相爲感咽

芳陰別業記

芳陰別業者怡邸之賓館也庭列六槐元蔭眈眈因以名焉  
根交幹竝枝樛葉接芳蕤霏其金屑清籟瀉其泉聲延來靄

於文槐漏停曦於鉅砌棲烏鵲而巢固翳元蟬而響遠彼承  
華連理之植都堂音聲之樹辟雍列市長安表街此之扁門  
各有取爾伏惟訥主入翦桐懿親苴茹世爵式赤舄之度  
篤緇衣之好漢宗盤石依總天之城衛國梓材創翹材之館  
軒扉南敞堂階北窳修廊迤邐曲檻邳張罍愚高褰楹非丹  
而采勝瓴甌方甃地不黝而文錯斯誠樂賢之懿規退賓之  
盛構也西通澹園廣環百晦雜花蔽谷秀草如波瓊瓏數峯  
護昭明之石几蜿蜒九曲是清河之土山紺核紫文之桃羊  
角雞心之棗株以千計與六槐相蔭映焉此又蘭坂之勝區  
梧臺之餘觀也鈞曳裾來遊敷衽登座德音不已爰處於斯  
爲騶夷而開第因休源而施榻賜羹以餐考叔設醴以飲穆  
生於是垂箔障喧啓窗納爽素琴上壁青簡盈牀遂以寧神

便體遊目寫襟向之質無伯通假館鄒君非所擬矣主人愛  
惜景光雅耽文藻退朝多暇命駕非時薰猊靜對忘沛獻之  
嚴矜捉麈燕談味臨淮之元奧乃或流觴授簡刻燭分韻蘭  
臺春暝則頌泠泠之風竹苑冬明則咏漣漣之雪鄴下避暑  
則賦維糅之瓜淮南感秋則謠連蜷之桂至乃游菽騁情追  
歡洽迹命王規爲酒令戲劉縞以水厄比射志其鶴目藏驅  
取其虎探若斯之鬯靡可殫述雖復霜晨葉飛月夕苔冷鄉  
心雲邁客影風搖而龍威之祕讀以忘憂鴻烈之篇引之味  
道厲公若此不其幸歟嗟乎昌國之裔乃避金門燕昭之臺  
猶存赤縣以符方今主人奚讓焉鈞滋媿已敬藉柔豪譽其  
嘉樹庶幾星精神燭光映銀潢繡腹錦心榮依朱邸豈獨佇  
鳳抽枝寧朔應教於柯樹當月留影宣城進賦於高松者乎

韓江泛月記

金釵擊琰酒氣成雲綵航閣沙水光化雪朋簪旣散人影不  
孤於是振衣而興指月而笑垂髫之女進而稱曰月在中流  
盡遣搜乎語妙天倪咸爲拊掌乃呼小牒乘彼輕颺金序始  
涼絨扇猶御交衿促坐展袖斂巾履舄相俛鬢絲可數蒼煙  
東積辨是韓山西面空明與城凹凸蟾蜍怪石下壓蛟宮鳳  
皇古臺上摩牛宿虹梁中限素輝不流榷館旗翻觴樓燈寂  
煙竹一弄譙鼓停聲檀槽繼撥林禽會響俄有遙星一點掠  
鏡而來舴艋相近則頃同醉之客也笑詫不已竝槩而謳卻  
指城中還囑江渚瓦屋萬縫簷篷千片莫不榻聲雷息幃影  
霧冥微我兩人孰追此樂者乎若夫畸人寡寐空階蛩旋秋  
士善愁野亭鶴立露珠承曉葦語助歎忻戚不符亦殊趣矣



嗟乎自稽陶寫已近中年臨汝詠歌偶成良夜時移境嬾俱  
怡於魂況復瘴水遊萃炎洲拾翠哀箏未輟華燭已寒爲歡  
幾何哉輒陳璫言聊永今夕時丁巳七月某日

種榆仙館記

種榆仙館者錢唐陳曼生大令舊隱也君名鴻壽別字翼庵  
壽吐耀於弧南翼垂精於甌北白榆厯厯連貝其間故館以  
名焉言觀有爛多象居廬三垣則有宮有庭列宿亦名房名  
室崇庠樓於緯度闕傳舍於河湄厥狀攸繁無資殫述乃若  
會稽處士仰列丹衢嚴陵客氣上徵乾象騎箕尾而淪傳巖  
降歲星而遊漢殿固以噉噉回回合符泰階肅肅闔闔同書  
東壁遠承桑野之曜高接桂宮之彩是則躋情霄漢抗跡駿  
躔摘珠斗于庭階攬玉繩于戶牖太虛爲室言實非夸若夫

榆之爲木也薄田可栽比戶宜植漬香有驗滑滫爲珍散莢  
成錢乃不貪之寶鑽柯出燧有燥物之用故思勰盛稱其利  
鄭渾特重其材卽非精感玉衡形垂鳥喙生瀛洲而布影向  
閨苑而移根而嘉樹之傳晉人母念梁木之思君子所切竊  
揆盛愔殆兼有十年之計乎然而館故無榆今且無館惟館  
額一方劉文清公所書也所至居室率以爲顏王生蜀舍在  
鄭猶名杜老高坐居夔不改高顙孩時之柳豈有十圍紐回  
庭前之槐初無半樹圖而存之寓意而已比擬顙榆懸額廳  
事適符故迹有若本然異矣哉夫齋號盤龍房謠止鳳彼其  
識兆誠乃不倫至如湘州郡廨是賈誼植柑之堂洛宮錄事  
處羅含栽蘭之宅此之互構抑又靡攷意者樓稱八詠將因  
沈約而更梁畫五羊遂由高固而始也君才本國器藹如吉

人高步文苑秀精執事勝流之所競赴名卿之所爭羅尊不  
暫空席無遑暝當其棲元梓里養素蘿軒檐聳三竺之松野  
色六橋之柳繼而毗贊幕府綱佐河防牒牘障其明窗簪裾  
環其短榻迨夫枳棲相屈匏繫爲煩翟吠之鳥紛泊城隅熊  
罴之波砰磅宇下居曾屢易境亦頻遷莫不灑然絕塵澹若  
無事書幌樓列琴囊壁棲燭炬偏而詩成茶煙午而客至簾  
開受月花影鋪菜檻曲來風草香馥穉自非超居物外曠與  
天游罕能若斯之適矣然則天地逆旅仁義蘧廬世何物而  
非榆人何適而非館蘭橈桂棟固比若魚鱗菌閣蕙樓亦虛  
同蜃氣王猷寄宅種竹何嫌白傅官屋遺檜斯在雨露俱潤  
風雲自通奚必桃李茂密長爲徐勉之園檉柏新淨終屬劉  
疑之第哉僕少有蓬心久睽粉社在天則蠹蠹繫命於世則

變變不榮抑劉巴所謂虛箕莊周所云散樸者也近移眷屬  
僦屋廣陵身宮與策馬爲緣故國惟牽牛共舍有懷伐木時  
佇停雲會君受代南來置家同巷東西對宇十步而遙旦夕  
褰裳壹笑相樂於時幽菊已澹冷楓欲丹酣嬉宴談揚推文  
史忘古人之旣違喜佳士之紛來雖休暢難常足申契闊晉  
張陸竝宅交讓之木以傳羊蔣同遊抱節之竿不朽君之光  
也僕何有焉聞新除溧陽從茲判別種花盈縣卽是河陽栽  
柿夾途將同建德君家仲舉有言安能事一室乎率爾多談  
遂書爲記

江寧清節堂記

代

在晉世尊如是我聞離摩耶而學道升忉利而說法感均生  
滅思永人天雖孝經之外篇抑達人之宏願是以賓童懿俗

猶承捷連之風賢劫凶兵立化城樓之乳至乃園給孤獨水  
名功德普賢願海養洽貧窮文殊善權恩儕父母故知體親  
作孝不悖於儒宗恤困明慈頗具於內典矣江寧清節堂者  
水月庵苾芻鏡公所募建也鏡公幼奉孀闇貧傷冷銚爰以  
母命出事沙門無著兄弟旣鮮天親豐干弟子卽名拾得誓  
非等於燔髮情實悲於捨身於是馨潔晨羞常假伊蒲之饌  
編欄舞服卽憑金氎之衣翠竹已陰紫護斯悴遺命募建茲  
堂大卹嫠緯蓋陶嬰厲貞故悲寡鵠衛婦獨處自憐孤燕茶  
苦其味松茂爲悅也夫臺築懷清簪人之明節閭閻行義熙  
朝之隆典至如葉陽哀寡貴后欽其風子驥矜孤鄰姥託其  
命今之義創出乎祗林以彼方茲良有謝矣矧其經繕棖櫨  
購營阡陌實懷指痛之慕用彰耳鳴之德遂使桓嫠呂母仰

菩薩之資糧梁婦孫姬庇祇陀之舍宇劉家金鏡灌佛咸來  
膝濡寒瓜療疴俱效是知德瓶常滿寄水必歸念此慈悲深  
足嘉尚孟蘭勝會水寺秋明甘露道場蓮臺春滿詎惟善法  
堂上應叩於楫槌將令孝德里中標聲於綽楔其徒蔡青雲  
者在家僧也須達多之布施龐居士之知識力贊斯舉功行  
爲多公以某有微勞屬爲文以紀石條具如左式成其志

青芝山館駢體文集卷下

臨川樂鈞元淑

與鐵制府賤

瞻星景岳已自弱齡蔭樹依風亦云累歲徒以分懸霄壤形  
判纓羅僑士部民禮嚴趨謁蘊誠莫展每以臆馳恭惟君侯  
應后牧之運建方召之績江淮所貫咸飲醇醲牛斗之躔靡  
不懷德乃復躬儀繡黻垂意草衣手秉圭璋論交栗贊操化  
本於儒術振宗風於菽林高懸鑑衡昭扶雲漢故華門流頌  
與部屋同聲若鈞者學如肌贅身無羽毛效景伯之舌耕博  
遵明之影質嘲腹滋懼抗顏爲慙是以廣陵太守辭而不挽  
何圖虞山書幣忽賁吳門特虛講帷以延末學問佳招之由  
至乃德意之所推旣用悚惶彌復慶幸夫以九霄鸞鳳念鳩

鷄之無枝干丈梗桷俾蓬蒿之得地固大賢之素抱庶士所  
均感也若乃范公之譽何遜初不知名劉侯之恤杜夷曾未  
識面今之獲此尤爲異數銘心鑄臆舌沓難申顧叨彼殷脩  
幸餉頤頰揆茲荒植終慙膺懷惟當事賢友仁時歌伐木飭  
躬端履不食邪蒿冀無辱於清舉耳台庀尊崇未敢驟陟謹  
賤陳謝不勝悽悽

答王癡山先生書

桑乾水縮碣石天濇鷺尚翥而鵲飛鴻不來而燕去一蜚絮  
草秋士獨聞幾葉辭柯羈人能數耳目所寓心骨悲矣故山  
幽桂已丹懸蘿自綠驅炎迂爽君子惟宜伏想履候康娛恭  
承慈懿故多勝也夏初獲奉尺一循誦再四訓詞周備仁義  
藹如語輟南中意驚墨表譽鶴解舞已見氈毼愛馬不鞭反



誇驥裏彥輔稱長平陽掩過古賢宏恕亦何加焉然或盛言  
條樂乃愧暴顛之魚溪歎鳩慈實感辭巢之鳥豈不以速其  
歸軫則阻以壯遊勉以榮途則慮其浪跡是故含辭婉約託  
旨閒曠俾之因機有觸擇義自居長者用情抑何深遠譬諸  
淺苓藥我口不苦而疾瘳醇酎飲人顏已酡而心覺某雖木  
石能無慙悟者哉雖然西笑一誤南欲彌勞此之羈挂實爲  
紆鬱恐違盍各之義不避率爾之誚千里恣恣惟先生督焉  
自履都門倏淹歲暑棲琴拭劍舍蟻邱之漿典研粥書炊楚  
國之玉公車待詔履印雪穿太學觀經衣鈎石破迫於寒餓  
不免就人於是借枝鷦鷯分粒雁鶩舌舛則菑畚少獲心織  
則杼柚其空幾於勞等賃舂困濟傭冶所謂窮援投林豈暇  
擇木餓麟不噬誰爲落毛胡有戀三升之良醞不憶莼鱸愛

十丈之飛塵反欺雲壑者乎此無所爲一也少耳時榮嘗爲  
興念及今矢志輒已澹裏特以湛露滲漣不遺於小草筋輪  
輾輾敢息於勞薪在三有二無所逃義故隨行逐隊以應秋  
賦耳然而鴛鴦之錦學製未工鷺鷥之膏塗鋒不瑩又眊捷  
徑爲歧途比要津於寒谷子敬之詣謝傳惟及寒暄徐勉之  
待虞生止談風月槐柳齊列桃李成蹊非所能矣是以寸朽  
被捐片長靡錄咎由自取怨復誰歸所謂濡體爭魚原非所  
樂投策分馬已塞其望胡有棄黃芽之訣欲攫化宮絕丹梯  
之枕思躋傑閣者乎無所爲又一也素懲烏集之交特慕鵲  
軒之侶雲霞旣合則送抱推衿屠釣可親亦開胃寫臆苟非  
其人特存矜愼漫刺寡詣連牆弗謁伊咎然矣輦轂之下流  
品紛紛或旅居而逢貴使或客座而覲時髦莫不棣棣其儀

疏疏其服膏脣調吻訥勢矜才堙曖之士蝨乎其間蘿袞相  
耀丹素縣絕避地未能避人奚可未嘗不徵姓叩籍說有談  
空暫對庶亦無乖久恩乃以弗任逮逮舉扇障塵拄頰看山  
魯國男子拂衣而去所謂蘭猶殊臭勢不可竝冰炭同器埋  
無久合者與隨則喪已遁則忤物屏風屈曲坂丸圜轉難矣  
哉無所爲又一也況乎仲宣體弱叔寶形羸儻竹則影寒哦  
松則響啞比達鄉縣益疎調衛風彊靡骨近日馭以無溫土  
燥裂脣飲天河而不潤若夫元子幕中伯通廡下昏鐙校字  
日眇猶披凍筆寫書手斲難輟春晨宜寐而車聲在門秋午  
欲餐而客履踐席凡茲膠擾竝損天和退之每以噤痒茂宏  
因而疲睡切脈望色徒恃於衆醫稱藥量水或煩於良友所  
謂蒲柳之質望秋先零橘柚之性踰淮而病孰與休神家衡

葆素邱樊之適乎無所爲又一也往在州閭頗耽徵逐壺榼  
之會裙屐之遊曹偶相攜昕夕靡倦今城野殊區軒航異便  
雷轟竟日仍在通關波沸四時不出人海屋無見山之閣眼  
與碧疎圃少蒔花之臺意將紅斷於是經傳昭之戶寂其無  
人隱子綦之几嗒焉喪耦至於銅街金谷綺陌繡郊賭酒催  
歌搖鞭挾彈道周側帽觀羽獵之牙旗塵後倚裳趁迎神之  
腰鼓則五陵年少四姓小侯擅縱橫於九衢逞豪華於百戲  
羈旅之臣謝不敏矣野逸之興減抑盡矣所謂畜魚於樹棲  
鳥於泉欲其鼓鱗游泳振翮迴翔奚能復爾哉無所爲又一  
也總此五故實萃百憂固將舍短用長全真取適夫碌碌珞  
珞詰人之懿戒纂纂鳥鳥處士之遺響誠欲鏤迹浩穰逃形  
密林依層青鑑活碧闢軒牖樹花藥馨膳絜羞奉堂上之養

鼓瑟吹箏罄門內之樂臘羊社酒敦戚里之好園栗畦蔬供  
賓朋之餽飫精華於縑素乞霸耀於賤豪上結古歡下交來  
詰則第五之名何減驃騎孰謂朱紫爲炫韋布非華鐘鼎斯  
腴簞瓢乃瘠乎歸哉歸哉畢世而已惟是舍畝十尺田無二  
頃荆牀息偃蕭券來呼朱戶趑趄魯困罔指綵衣博笑詎懸  
鶉之能欺脫粟僅甘矧餐紙之可代此季路所以傷喟仲孺  
所以慚忤者也加以燕吳遼絕川陸阻長秣馬無百日之芻  
乘流鮮一舸之費棄繻難返終軍已慙贈策壯行繞朝孰是  
若其舂糧不宿重繭遐征恐中途困阻無傾褚之逢逆旅見  
疑有奪鬲之患此嗣宗所以慟哭季子所以枯槁者也嗚呼  
畱滯之義本異周南悲咽之情無殊隴首而身爲債帥命應  
客星交無許史之援戚少崔盧之託進不能荷戈執畚效用

當世退不能懷鉞握槩修明絕業竣烏顧免一何迅疾素衣  
塵化元髮鏡周徒使老親倚閭病婦歎室雖復幸符誰占暫  
紆鶴望而求食之蟹離殼不常轉風之蓬隨波復遠已焉哉  
天實爲之謂之何哉進歲奉和二詩曾塵几席里同巴曲哀  
逾越吟蓋平子愁賦早有遐心伯鸞噫歌感爲同調假蒙褒  
飾其辭但以悲激爲過小人懷土遂爾戚戚彼時褊狹良足  
悔報竊意和犢目盲得駿髀折祥咎靡朕枯苑有期誠宜蓬  
累而行推移於世希大穫於畏壘效傭隱於顛軫一旦纍祖  
息交黔婁改運則題橋之言可委流水衣繡之喻無慙故鄉  
烏在蹲市齧餅入山采芝以爲高韻乎爰乃委心任化抗志  
卑躬將求薺甘於荼苦等握冰於執熱亦謂貧窮曷旣聊試  
太行之優漂泊伊初敢羨紇干之雀特罄委瓊以洗前言先

生觀之其以爲賜也曰損乎抑商也曰益乎幸因郵傳增益  
教條崇護維時多不宣悉

與談觀察書

景雲欽風爲日久矣崇庠懸勢遊止殊區緘懷室蹟義分宜  
爾若乃上牀責食則驚蜨爲譏負書候車則雕龍靡挾不介  
而見故不敢也嗣幕下諸君來過邗上者多稱雅論特許鄙  
文以謂握珠抱璧實嗣古之才範水模山有成章之斐雖復  
寧朔盱衡宣城借齒方之於今何以遠過於是淫淫其汗惴  
惴其心燕駿滋慙楚鷹何副伏惟執事夙領著林早踐華闈  
蟬冕春映麟管風飛比當砥柱之寄主茨防之任金隄沈馬  
勇埒王尊石洫施梁功希鮑昱亦旣宣勞舂輦告瘁櫓櫟然  
疏闕之餘不忘執棗籌察有暇無懈削竹冰雪內瑩龍鸞外

轡是以英流仰鏡遠士望塵誠感躡履之隆節慕傾衿之雅  
度也至如鈞者山麋戀草澤雁依沙與元旣謝於揚烏讀書  
未半於袁豹徒以少耽柔翰長厠逢掖撫眇躬以多緒闕眾  
製而有跂輒乃搖襏紙札劇忧心膺管諸頑石莫礪裂裳難  
補自稔投瓢之具惟供覆瓿之用何圖偶播愛口遽瀆神臚  
遂承光影之褒不翅聲聞之壽是知夔曠審器兼取於枯匏  
岐俞用方不遺於敗鼓矧其何遜隔面邀譽舞陰仲舉高位  
降情徐孺中心藏之何日忘之雖幅巾就謁未有前期尺素  
自通聊希達哲其敢避未同之誚默爾而息乎淮流屈注心  
溯爲勞臨書悚息殊不宣展

荅劉醇甫書

醇甫足下重枉瑤華乃始披展千里而近遶若遐荒過雁留



音瑟然空谷嗟乎虜聲豪翰尚爾艱滯罄臆几榻彼何時哉  
昨夏渡江南返紆櫂東陽握麈揮犀俟焉告暮已而籍康湛  
飲山葛同酣遂使赫曦失威媚魄欲駐雖一日之暢有千載  
之念焉嗣是杜跡山樊塗塞耳目朝計鹽米夕理松朮俛仰  
之會零露已霜匪徒軒蓋不逢乃至比鄰闊絕通蔽自訟忻  
戚罔分又非近歲之我也歲暮復出還至廣陵比假閒園以  
逃炎暑花藥無主禽魚相親貴遊欸辟疆之門舍者爭楊朱  
之席笑而仰臥以待涼風此邦之人莫我肯穀卽當別淮雨  
歌吳趨耳想足下在彼東道素交北海重客哲嗣受經於前  
高足問字於後君子三樂良繫於茲加東陽地偏幽奧所蓄  
對成羊之石心薄頑仙訪釣魚之臺神契眞隱心跡雙寂康  
樂因之讀書視聽無擾宣城從而襄古比之邗上雖盍簪有

謝習靜過之況乎長慶詩編在江陵而成軸襲美文藪處襄  
陽以自序大集哀然素業成矣乃來教惋鬱使人悽欷憶慟  
哭之陳畱愴風流於鄴下循階弔影臨渚茹歎觸緒芬如奔  
豪集攄詎非平生厚善夢寐斯縈抑追維舊賞難以境遷邪  
足下處夷惠之間遊莊列之宇蟬蛻塵表去住灑然猶復拳  
拳故歡淒其不已矧僕之惓惓無倚有不需歎積息者乎且  
筵散燭滅孰與投筇而先行歌歇臺空孰與聆音而遽去是  
知今昔之感豈必易方以此牽懷僕爲酷矣僕春秋四十有  
二朝譌勅行正在茲年林宗殂殞亦當此齒材朽謀拙知命  
不猶寧復希榮 盛代取訥時髦惟在文辭猶難割置然學  
不糞心言非根道徒耽聲韻頗流騷怨譬鴟鳩一嗅春物改  
榮筆策再吹夕響皆厲窮愁自寫如斯而已綜其微旨略符

盛裁至霸攄怪發藻逸葩流薄技絜長終謝不敏信乎舍本  
齊末勢不相及者矣勞蹤卒卒未有專思零紙叢殘無遑整  
輯恐遂委矣蟬亦自惜也頃有所製彌復蕭寥郵筒恩促以  
俟續遲因時自愼彼此同之

荅曾賓谷廉訪書

江湘通波鯉書非阻吳楚懸壤鶴望爲勞伏承執訊注存一  
何敦摯在霄黃鵠垂意壤蟲作室梓材有歆散木循環累日  
感歎何已明公宦情恬寂民隱洞周今函所及詞旨矜惻盛  
古流涕於丹筆勝之樹望於繡衣道路爭傳誠非虛溢至乃  
民肥家瘠俗晏身勞仰體蕙慈倍宜崇護江東士庶夙霑河  
潤欽遲旌旄豈惟羈旅果爾則石湖波月林屋煙樹叨陪歌  
歡又一時也鈞命途屯賤不蚤振拔年逾不惑志業未融乃

至郭無二頃屋有七星播越老親此別宗郇搏沙聚葉來止  
吳趨稚川移家惟攜琴籍公瑾推宅仍近市闌城帶葑溪坊  
鄰袞繡斗米五百物價倍常瓶罄筥空擾心絆跡蒼厓碧水  
啞其笑人乃謂踐約青芝式符素志匪所副也齎鹽不充特  
資影質舟車莫賃遂阻春關未嘗不動色新進馳情榮路豈  
其繼三高之舊躅希六逸之高風者哉且夫特立之士邁羣  
之英進可匡時處能薰俗徒以性儕禽鹿悟怵犧龜遠害樊  
籠頤光泉石非必莼鱸在饌卽是季鷹杞菊樹庭斯爲甫里  
來教所許彌以增慙然而舟鐵釜木孰能爲用是沒漚浮終  
便所好第使奉親有膳澆曾得酒江湖不窮其往風雨不迫  
其行固亦審已循涯韜愚養拙雖仰謝考盤庶同漁父明公  
功業未究振履方崇瞻泊爲懷懸輿有日如不忘後鶴同卜

煙蘿指點前圖樓遲勝賞求過蔣徑裴附王舟有榮耀焉惕  
甫廉山衡宇相望甘亭恒齋賓于方伯稚存久不展接頻伽  
間復來遊身世各營觴詠鮮集垂詢所切敬以知聞多思曩  
日邗溝輟櫂東府招賢酌月影偕陰秋響苔雖復顯晦殊科  
意況靡二時乎不再恍若華胥諒非木石能無永歎者乎賈  
生舊宅聞在星沙鄴侯故居亦畱衡岳今無恙耶良用神往  
金德薦爽福祿多宜睠睠瑣懷殊不宣突

與姚春木書

春木仁弟足下無恙往者傾蓋投分停尊執別音塵闊絕頗  
頽四霜雖嘉響易流曷攄心素驚聞苴杖旋里銜哀倚廬彌  
用縣愴以足下摯性永慕踊節或踰濬冲骨立崔九風倒伊  
可懷也伏惟仰承聖善厚愛景光吾道幸甚足下雋邁時髦

研精饒著噴墨聲流彈豪寶溢卽間覩其一二未能測其所  
至然朋輩推挹謂爲寡雙定不虛耳若夫矜尚之淵曠識議  
之閎達僕雖暫覲窺其深矣夫威鳳一羽足驗五德要褻一  
顧可信絕羣悠悠我思云胡可輟比甘亭來言足下眷矚之  
殷不啻於僕亦復賞其語言是猶身衣狐白反取短褐之溫  
鼎列鼃羹不遺野蔌之味得毋使小巫氣索河伯興歎乎僕  
少失庭訓長而游惰經籍束閣塵壒積習徒以師友縱臾勝  
流漸漬遂乃操觚襞楮飾陋縫疎自顧每以覲然同志輒爲  
假借不圖足下之復爾也近自吳下徙家廣陵傭書不支鬻  
文罕售累心之境旣益其荒羸茶之侵重增其懶已矣譬諸  
工不庀材構凌雲而曷就力難濟勝觀蒼阜而不前足下猶  
以少壯期之乎方今才傑如林苦不同趣博或溺心華乃鎖

骨操戈伐古刷鬚媚今依喬附灌剽金竊珠者比比也僕雖  
謫劣未敢相師幸有如足下數君子者志侔神合劇切無吝  
乃前既舍業今又病忘風雨如晦雞鳴不已雖復惜三餘於  
季直效五箴於昌黎其不能聖鼻爲質附尾以顯也審矣頃  
欲挈舟造訪敬拜尊上之靈兼持所業就爲裁定遠行不易  
於邑何已然則聲氣自由性情晤語乃關運數偉哉造物固  
如斯耶方臺山旋吳藉通尺素附上名紙兼注年籍用會如  
昆之愛希歲寒之盟百維葆護還佇德音

荅楊少晦丈書

昨者伏奉手畢發緘展誦珠璧同珍猥承不屏愚頑相爲談  
藪扶駢文之奧示以筌蹄宏獎飾之辭策其駑蹇發矇不足  
喻其快浴汗無以紓其赧神靈形茹莫知所裁至乃撝抑沖

然過自卑牧雖以擴猶土之量淡若谷之衷施之末行竊疑  
或未允也鈞自童牙恭聞庭誥卽知鄉邦文望實在元亨生  
徒術業咸宗伯起傾風仰鏡積日爲勞嗣獲暫接裊憑稍聆  
緒論而魯慙叔譽對語輒窮聰謝阿戎清言弗解先生胡乃  
屈耆夙之分反假後秀之譽邪仰此謙尊感悚兼至懼孤盛  
旨率復申荅冀長者之甄汰焉夫魏製晉造原討葉於二京  
宋杼元規乃絕潢於六代李唐若華岳中擘遂區東西長江  
橫貫永限南北王盧四子微變前模陸九一家聿開新轍然  
其間如燕許鉅手韓柳鴻裁或以躡齊轡梁或遂迫遷躡固  
是則撤奇偶之絲蕞通古今之梯航者也宋世歐蘇尊如斗  
宿至其儷體實祖宣公多用之奏記取其莊重條達乃餘技  
耳此猶後世公牘各有體裁未足多議先生以謂不可廢誠



哉是言又謂儷體至徐庾而工亦至徐庾而衰尤爲探古之  
識蓋散儷無分者魏晉以前是也截然爲二則漸於宋齊成  
於任沈極於徐庾於是金羈玉軟騁轡揚鑣紅蕊黃鶯悅魂  
娛耳以云衰也豈其然乎顧散儷無分則徐庾避舍散儷旣  
判則徐庾登壇何者徐庾之衰衰於散非衰於儷散則徐庾  
衰儷則徐庾盛矣爰知先生月旦蓋總散儷而科之也前者  
侍教從容泛及桑梓因歎山鍾川孕何乃無多誰起蟬聯胡  
然不續良欲家藏鸞錦人握蛇珠非謂文獻無徵風流遂歇  
至於英絕領袖如來論所稱者固以照耀搏桑聲聞海宇幸  
同鄉縣寧云充耳昔子綱枿枕孔璋盛推長卿子虛楊意論  
薦古人高例私願所欽先生方以閭井之義援引後進鈞敢  
以蠡筦之測妄議先喆乎哉若夫振樊起衰掖才扶運自非

身躋霄漢則洪響俱瘖口沛江河亦煩言不信執事爲人倫藻鑑士流冠冕抑猶惜焉不居讓而弗任鈞何及焉辱徵小稟粗呈所錄乞大加繩削庶識津塗歲暮人事大繁又值宴集竟日剪燈引紙無暇擇辭敬希垂鑒惶悚惶悚

廣儉不至說

唐來鵠有儉不至說譏公孫宏晏子徒儉其身不能儉其君故以爲不至偉哉言乎可謂知要雖然儉之不至微直此也蒙有進焉請演其緒夫老氏持約身之寶夏后垂範家之謨聖喆盛談載籍遞紀儉也尚矣然魏風之懿葛屨興刺齊相之顯狐裘蒙譏墨之儉也苟卿斷其彌貧儉之失也尼父亦云則固意者以之經世斯不至矣乎皇古之世智巧未祛鹿聚麀居金藏玉韞嗜好無所誘服食無所貿澹泊恬愉匪由

化導中古百產吐精五材入用智副其欲物應其求趨華就  
靡口新代盛矣於是聖人權衡其綱搏節其目上以儉帥下  
以樸從其時土滿田均物充財阜彊不敢奪弱不見凌然猶  
豐饒難齊博濟爲病故又爲之講任恤之誼權裒益之宜使  
五黨相調四民有養一作四窮有養此旣納之於儉之中又廣之於  
儉之外者也周季以後捐田予民聽其自守由是豪彊者兼  
并愚懦者割裂或千倉而飽鼠或無塊以抵雀恒產旣替民  
用孔藪積至於今遞相贏絀其間令辟賢輔曷嘗不焚裘捐  
璧削鏤斲雕慮畊織之有妨冀金土之同賈常不百年而風  
俗漸渝困匱滋衆職何故哉所有不均所無相易倫類之雜  
好尚之差惡能不窮而變不通而久終以儉持之乎故儉之  
爲訓可行於革故鼎新之始不可行於人稠物聚之秋宜以

勵中民不宜以戒素封也何者流亾乍復唯生息是專井竿未殷有疆畝可闢則浮濫宜禁而凋敝易回也迨夫生齒既繁百否而一泰物產有數此壅則彼塞則苑枯縣絕而流通爲賢也多收削麥積之可昏少費緡錢權之可葬是挾約之醫窮乏者漸裕矣若夫持籌握算無爽錙銖藏鏹封圉不枉絲粟是保豐之鑰封殖者益固矣嗟乎細商短販猥業璫工習片藝以資生傭一役以邀值莫不聞鼓啓關披星返宅專精厲意伺便趨風分光於足穀之翁借潤於多財之宰情同負耒惰異委綏皆良叱也不可矜與使其操斤削墨而崇愷以美室爲尤嫺歌解舞而魚徐以嗜音相戒焦釀列肆珥貂者繫馬不前樓鯖饋門鼎食者麾手使去是富人無落毛之損貧民無食力之望也其不至穿窬肘腋逃林聚澤者幾何

哉且夫未富茲富專利無厭錢癖地癖財固顧人非焚重  
家無邠超何羨讐積於鄉閭羅尚名腥於邦國不使之耗金  
以釋怨損訾以弭災將見悖入悖出多藏厚亾亦豈富者之  
祥乎果其畫卵雕薪漿酒霍肉誠宜裁制以杜暴殄若乃被  
紉襲綺卽紅女之資購玉求珠伊賈人之利雖復縱情博塞  
溺意狹邪此焉揮灑彼焉沾丐孰與廣列紫標深藏寶井者  
邪故貧富相軋調劑斯平有無相資疏通乃溥去其泰甚順  
其自然庶高岸無驟崩之患窮谷靡長涸之勢矣抑又思之  
草翳禽喧則時序方永林疎水澈則歲功告晏此亭育之運  
也洪淵巨藪靈藏妖露清渠曲沼藻潔鱗稀此廣狹之形也  
是故繁雄之區饒樂之地方舟結駟袂幄衽帷里譙而巷謳  
雲行而霧集兒童逐其墜丸行路拾其墮舄家無儋石者仰

食於機利身無術業者待給於敖盪斯名都壯縣天下稱焉  
及其謫鐘罷響遊騎稀出朱門白屋同其素風而彫剋之象  
成矣金穴之家寶庭之室肉臭醇敗夜日晴雷臧獲之籍罔  
稽田園之方弗問內外隱賑身心宴粲及其考覈歲入裁減  
月廩子弟以私囊自防賓客以俶褻爲智物不妄市食無冗  
人主人煩憂家督叢謗而苓落之兆見矣豪奢則如彼節嗇  
則如此孰興孰替孰榮孰悴譬羸老之損餐不如少壯之饗  
餐也病夫之調攝不若健兒之跳盪也灼然之驗又何疑焉  
或謂衰伏於盛貧基於侈彼秦晉之民臧富者殆萬家席豐  
者常十世非儉之效與是則然矣要其山川所鍾習俗所束  
比戶崇魯褒之論奕葉傳計然之書庖不烹鮮則藜藿饜望  
市無粥錦則緼袍何恥士沃民淳厥風猶古它郡不能矣良

以水滿則溢木茂必凋天概於上人爭於下盈虛之數消長  
之機不可遏也試觀孩提至樸見紅紫而屬眸乞丐至嚮聞  
膏粱而流沫孝子順孫或俯高曾之矩端儒慙士難戾鄉邦  
之俗將欲剗明塞聰違甘就苦使腴者若瘠隆者若窳以保  
厚實持風會得乎哉然則通計宙合總庇羣生人浮于土物  
限于天源無可濬卽流無可節厚無所減卽薄無所增逸詩  
云九變復貫知言之邈長戎嶠之吝錮程卓之饒未覩其有  
裨也夫春娛糗節水次之民獲紆秋賽豐年社場之貨易售  
伎樂非制而大酺盛陳競渡不經而荒政有取苟通其意其  
揀時之則乎

重修朝雲墓碑

紫蘭香徑佳人葬骨之鄉青草平原詞客招魂之地是以太

原博士製西子之挽歌同州使君補清娛之墓志況乎解禪  
天女曾侍維摩投遠孤臣獨攜通德釵分颶海粉墮蠻煙如  
東坡先生侍妾朝雲者乎爾乃明妃族姓命薄桃花蘇小鄉  
親家藏柳色青蓮胎性不爲行雨之仙白玉鐫名偶共吹箏  
之婢惟先生通犀自病磨蝎爲仇旣忤釣衡爰乞符竹看花  
吉祥之寺權舟明聖之湖姬以待闕之鴛鴦爲脫籠之鸚鵡  
喬家碧玉歌舞曾嫺薛氏青衣圖書特掌小星一點獲近文  
昌片石三生長依玉局比之春孃換馬溫女埋沙斯獨幸矣  
已而嶽煦漂山二毛度嶺謝公哀樂已過中年白傳遷謫殊  
非樂土雲房寄宿況味則全似山僧鶴觀移居形容則方成  
病叟於是楊花亂落燕子爭飛怨開閣之何遲歎辭樓之不  
早姬乃芳英戀樹嬌鳥隨巢井中之水無波雪後之松空翠



嗟乎昌黎北使侍女潛逃枚叔東歸小妻不往彼何人哉豈  
不以義非匹敵身可去留遂乃忍負前盟甘爲怨耦若姬之  
貞情獨摯禪味同耽伊可尚也然而瘴霧侵蒸玉肌易瘦炎  
雲鬱爍冰宵詎耐轉喉落淚怕歌芳草之詞卻粉洗妝懶作  
梨花之夢金剛忽誦歸臥竹根項畠孤行難迎桃葉良足悲  
己先生託詞么鳳比曲哀蟬雖復心傷響板淚零車鐸悽感  
之懷曷以喻之嗚呼生無金屋之藏沒鮮玉魚之斂塏仙空  
禮山鬼爲鄰憶母則錢唐潮高望夫則釣臺鄉遠荒亭漏月  
舊碣沈煙霏蛻雖存芳蹤漸沒矣夫其人稱仙妾墓號賢姬  
允宜推愛屋烏觸悲墳燕重鐫山骨式薦溪毛豈有樹不成  
圍花無含萼而聽樵蘇踐壟牧豎侵塋榛蕪圯毀如廢壘者  
焉客艘偶滯冒雨來尋邨釀莫陳持花中弔巡愁臺而才丁

仰徽露而惻傷爰告太守伊侯亟加修葺遂徵鄙製將琢貞珉屬工役未遑故歲月不具蓋有待耳明湖十里春水猶香小山四圍晚霞如繡埋香之宅生金之碑以永斯邱竝諗來者

勝國天潢小裔墓碑

鶴飛吳市松色長寒鳳去秦樓簫聲載咽結遙悲於迷代畱芳蹟於藝編邱隴已平妍華未歇若夫京陵公子都尉孤孩或奄忽於雛齡或隕摧於綺歲莫不書翰傷幼辭誄敘悲文人所悼固以不朽至乃吳王小女沒傳南山之謠隋家縣主死廢露草之句雖復荒渺頗亦哀豔故知佳城葬玉簪士愴裏古冢尋碑幽魂慰恨者已天潢小裔之墓者在普寧昆岡書院琢玉軒前邑人傳言明宗室女窈骨處也宋號族姬唐

壽縣主生從桂殿原稱月姊之鄰系出桐圭卽是天孫之亞  
父朱統鋤號肅園崇禎中以宗貢廷試進士出宰斯邑葛洪  
爲令匪覓丹砂申錄居官爰來白鳥治縣有譜諭蒙畱篇不  
幸際典午之陸沈當朝歌之錯節黑丸夜探黃巾猝興禦賊  
倉皇募兵寡弱戰敗死之追贈太僕寺少卿史臣失錄邑乘  
其載焉其前二年實立斯墓歲紀辛巳時繫中冬因邱爲墳  
磨崖作碣右書曰父普寧縣正朱題事在前朝蹟同疑冢陳  
思無哀辭之作金瓯靡徵李翱無別女之文足娘遂晦說者  
謂馬骨既朽牝牡莫知鸞影斯遙雌雄誰辨然口碑流播語  
必有由貞珉題識義將可釋也夫謝家道韞非當待字之年  
李氏平陽未行問名之禮言不出梱名何以彰矧乎衍銀潢  
之派兌位彌尊分玉葉之華異宮尤閎故宜著稱黃祚比齊

魯之氏姬姜表志元堂異苔華之鐫琬玉若其揚烏短折曹  
喈早夭男子之稱曷爲隱之以爲太僕之女墓蓋無疑爾且  
夫女挈歸骨斯有曠銘與信傷心初無墓誌非其略也或有  
待也嗚呼娥臺仙質若木嬌枝上鬢未製於玉釵入穴先埋  
於金枕塵封翠幄寶瑟自僵日澹黃壚漆燈易暗西陵非紫  
蘭之徑東海無白木之廟冬青樹死哭杜宇之三更秋菊花  
濃少寒泉之一盞不亦悲乎想其繡襦嬰妃絲髻婉婉或能  
書紫石或妙解朱絃玉映閨中珠擎掌上瑤臺露重則環佩  
生寒湘簾風動則衣裾欲化固已華如桃李質脆琉璃蠻煙  
與瘴雨交侵粉絮共香泥俱掩宜其然哉夫使忠臣碧血不  
灑於沙場王孫芳草重生於故國則邱首必正芳魂自歸國  
塲如彼旅葬遂如此矣嗚呼方明之季寇氛蔽乎四海兵氣

纏於三輔諸陵白露羣社荒墟沁水園林鞠爲茂草太平莊  
第變作桑田女雖無恙亦不過同臨海之叱離樂昌之零落  
已耳今也飛鳧仙令獨立桐鄉之祠雌鶴前身詎憶姜嫄之  
廟團欒九地骨肉相依遊戲三霄精魄永奠庶可以無憾者  
乎詞慙幼婦匪比曹娥之碑歌稱帝子用弔湘君之墓云爾

故明寧庶人妃婁氏墓碑

夫盤石凝脂帶礪每延於苗裔鳴鑾佩玉簪翻自樂於房敖  
故生同寵樹之棲沒備霸輜之飾茅壤雖變石獸故蹲藻井  
俱荒金鳧宛在乃至山花煥舞虞畱西楚之壑塞草孤青嬌  
表北蕃之墓身戕閭運骨瘞窮邊竝炳跡前編飛華隔代未  
有際乾坤之普晏居宗祏之康娛月御罔顛天潢倏沸爵高  
五等而內主化爲寃禽地兼數圻而小君歸無故土若前明

寧庶人婁妃之不幸者也妃系纂冠紳家承組素珠胎夙世  
玉映筭辰鄧顯號於諸生甄儕聲於博士書追茂漪之迹歌  
繼唐山之風作儷王孫實稱祥女花釵九樹穠綰鬢雲紫綬  
雙環穩垂腰袂紘縵式敬周折乎禮閑繁藻修虔演迤乎詩  
教含章賁於帷帟惠問洽于編氓何圖生世不諧遇人不淑  
竟至湮香恨水委鈿哀邱吁可悲也庶人慶襲寧藩才輪燕  
邸耐金未責分寶攸隆卽非誕德欽明鬱爲宗傑亦宜厝懷  
平當式固靈根猥以街兔興貪檻羊爲恥拒鄒陽之諫信張  
博之諛玉鶴金龜符瑞先作輶車銀矢軍械潛增逆節平萌  
姦謀迸露豈不以義陵乏嗣則箕子登尊洛表盤遊則仲康  
肇位然而蛇鬥無妖蟲文罕據顏忠圖識卽爲亂濟之徵卞  
忌神言反是傾梁之兆妃乃隱憂叢桂託諷蒼苔衛女戒荒

耳充淫樂樊姬諫獵口絕鮮禽莊姜則頻刺終風鄧曼則早  
傷槁木陳叔皮之至論贊建德之嘉謨彼狡昏孽終焉竊發  
於斯時也邯鄲繕甲奮劉遂之鋒劍閣揮戈肆馬勛之暴烏  
弓彈日狼燿矗天艤幢進而星渚夷鉦鼓鳴而江州下自謂  
誕膺天命立斷神機電埽南都龍升北闕矣乃王文成上游  
掩壓一戰成禽振槁摧枯曾何足擬其易乎如吹律知凶聞  
笳湧淚原拌焚玉卽賦懷沙於是匡山慘霧鬱薄重霄樵舍  
奔濤倒流三日土人哀之收而厚斂私葬于豫章德勝門外  
龍興觀側衣非畫雉棺尚斷桐上崇四尺之封下周三泉之  
固雖云不幸公論昭矣夫舉人不孥議賢有典藉非成光祝  
詛昭信如虐荼奪田于淮甸謁祭石于瓠山俘獻之餘可無  
從坐以妃之忠誠不黨苦諍有聞鬼神具知日月斯鑒矧乃

狂夫悔恨自述閨言敵帥仁明必釐訊簿固可援曹彪之例  
徙置平原或且因義恭之言俾還屬籍然後招魂而葬東海  
待命而就伊吾常理恒情諒宜出此奚必驅狐地下先應楚  
雲之災把玦手中同殉齊虹之變而如必速於死者何哉良  
恐虬髯重色蒙巢刺之嫌駢脅忘倫懼懷羸之辱甚乃擄同  
臨海遭送女於錢溫此等南陽供賜人於劉粲則符家烈后  
豈復偷生蜀國昭儀終於自殺遲遲未免汶汶奚爲此如所  
以結繩爲防赴波自絜者也嗟乎向使庶人布帛有幅蘭芷  
毋漸斯屏翰之方牢豈輜軒之獨償抑或朝廷早計政府和  
衷詰僞璽而案江都執私書而窮延壽裁百騎之衛則稱媿  
難行削千戶之租則贏儲鮮恃小懲大誡小人之福也卽令  
腐兆爲殃牛旤告罰惡未稔而先斃孽非著而可弭猶足仰



保洪基下緣黃祚丁斯怙亂受其貽戚固人事之所致亦天  
實爲之邪妃之外家因茲易姓咎之襲敬以說漢而賜劉今  
則鍾儀幾爲郎而囚晉嫺連帝族無增戚里之榮事傳爰書  
何解畔人之黨冤乎哉情比范睢跡鄰梅福蹈蹤累葉掩涕  
荒塋始憑標碣之書獲守占山之牒泉乎鼎革有若陵遷時  
則巷吏門兒指云官地芸夫販婦規建私廬庖漏汙元宮倉  
敖夾隧路佳城鬱鬱疑冢茫茫杜氏之葬在西階樗里之墳  
直武庫方茲濁擾彼何有焉乾隆辛未方伯彭公訪知其處  
表識於前亦越丙申觀察吳公購徙居民肅清於後禮也太  
史蔣君特遯其事兩製傳奇用資流播嗚呼二百餘年乃安  
斯寢新龜趺於瓦壁譜鸞操於絲簧行路輟嗟邦人加肅賢  
侯古義大雅瓌辭所以揚闡霸芬光慰貞魄亦云足矣余夙

探史籀有欽嬪則載披院本重感寓言撰志假擲米之仙書  
碑託寫韻之腕貞珉之琢蓋尚闕如竊以湘女巫歌已關騷  
筆殷如璧誅猶登選樓語涉虛無意存粉飾況於梓鄉舊事  
咽彭蠡以同聲松宅神光連豐城而吐氣者乎雖汁謝金壺  
豪枯銀筯傳徽累德其能已而且夫欽夷補頌非門采於龍  
門祭屈敝辭詎增華於賈傳教修楚元之墓季友操其觚表  
守孫氏之陵士然奮其藻凡以寄悼賢之意據弔古之情云  
爾爰撰旗旒冀鑄壘兆庶幾金精紃鏡繼暉張女之山珠月  
膏燈旁照滕王之閣銘曰

南昌獻王大寧徙建險失三關衝當五戰陽移善地陰杜雄  
萌奪巢是懼離穴胡成蠶爾宸濠興迷構亂苞納凶邪騰騰  
悖悍班劍猶加歐刀尖斷虎養朱閑鯨翻紫漢內結璫纓外

招桂莽燕馬通謀吳錢市黨負乘斯占倂規必爽殲旅天弧  
縶身雲網變彼賢妃蘭儀玉度締裕章身珩璜節步翼化蠶  
宮臣猷象輅有煥彤闈無防溜蝨方王圖逆妃察其微謀嗤  
馬鑾諫切羊機縈愁綬帶拔血褱衣明心月炯義色雲飛妖  
士瞰符佞臣進畫張尚遭誅枚乘去國惟此孤箴曷勝羣策  
鬼贊厥謀天奪其魄夜講兵鈴晨修戰舸賦鐵造凶傾金買  
甌若魚貪鉤如蛾赴火王慮靡回妃言無可乃戕曷吏乃驅  
衛兵逞志溢浦搯吭皖城守帥搗穴王師建瓴箭飛列艦煙  
逼連營妃旣脅從志絕生還澡躬彭蠡騰恨佳山珠沈漢佩  
雲汨湘鬟徽靈獨絜戰血無殷川后收波風姨返轡五老送  
輶雙姑引旆星墜石浮鸞迎蛟避擴矣神塗歸哉舊位邨女  
進釧野人蕪香僉營碧葬共購黃腸燕銜積土雅噪頽陽私

噉麥飮暫酌椒漿嗚呼哀哉蘭宮兮蕙路轉暝兮禾黍收樓  
兮網塵翠翹兮化土驗城郭兮依然望平蕪兮延佇秧歌惻  
兮猶傳樵蘇樂兮相語憶含辭之隱諷兮彼以規而爲瑱比  
戒且於司晨兮若冥行之無見棄咸陽之玉几兮就淮南之  
輜車在縲紲而方悟兮障羞顏以歛歔戈劍鎔而金流兮旂  
旃燼而灰滅何雄幹之易摧兮信大弓之難竊從宮亭之神  
女兮幸免逐乎纍囚哀萬眾之爲魚兮胡獨寫悲乎篋篋惟  
坤儀兮罔忒使人心兮太息撥沈戟兮認遺釵奠幽宮兮報  
明德頑骨燔兮都市露蛻藏兮江潯蒸封土而爲麝兮鬱碑  
字而生金順逆如川興亾若火持楫維人止薪自我七國驕  
顛八王侈墮智遜閭中名儕間左魚不爲龍鳳乃隨鴉泊泊  
江水泯泯江花數奇遭厄連往畱華昌暉在婺餘墨成霞社

樹兮改柯雲枝兮翦葉并塞燕脂廊積響屢竝沒影兮關河  
亦銷聲兮紀牒茲石誌兮丕彰諒璫懷兮允帖

按明史妃實爲王文成收葬而蔣心餘先生一片石院本  
以爲葬於土人蓋得於婁氏後人易姓鍾某者之言似更  
可據故從之 自記

重修邯鄲呂祖廟碑 代

三里五里之霧化人所以障身一丈十丈之塵僑士於焉稅  
駕是以鞭鸞碧落下戲寰區策衛黃昏遠投墟里情懸霄壤  
跡合雲萍借茆店以韜真就荊牀而息困懸冠雜坐雨蓑風  
笠之餘曳袂微談茶竈酒壚之側關無尹喜寧辨牛車市少  
長房孰騎龍杖不過飛蓬自歎泛梗相於或笑蘇子之裘或  
爭楊朱之席未有語聯傾蓋緣等爛柯遂乃接翅三山超神

八極若盧生遇呂公於邯鄲者也於時蘆簾蔽月土銼生煙  
此據榻而從容彼褰裳而欵曲初通姓氏將交長者之歡略  
話生平遂觸書生之感顧巾衫之拓落悲火燔膺慕簪組之  
輝煌狂花眩目晤言已倦凝想滋迷公乃探其布囊授以瓷  
枕雖非瑪瑙自可遊仙何必芙蓉始能致夢爾乃逡巡得路  
迢遞還鄉締昏則鏡寫花顏應舉則衣彈柳汁建牙吹角勛  
臣衛霍之家補袞調羹元輔伊周之位加以張蒼壽考石奮  
兒孫五十年閒曠無倫比鐘鳴欲歇瑟散難延而枕上欠伸  
黃梁未熟烏虜彫耶神耶妄耶真耶何合眼之須臾竟畢身  
之苦此似爲胡蝶幻影初離曾啖櫻桃餘甘尚在於是嗒焉  
若喪蹶然而興悟蕉鹿之果虛知茅龍之可駕橋邊進履旣  
遇真師海上攜琴爰傳絕調斯亦勞人之至願旅客之奇遭

矣或謂呂公卽吾呂祖或稽年代又謂不然傳聞異辭無煩  
淡辨竊以金漿度世乃上士之慈懷矯簡書名亦伊人之夙  
分況我祖師心通太始道合自然閱天上之春秋忘人間之  
甲子金繩玉版久隸清都風馴雲軒偶遊赤縣是其先天歲  
月邗和璞算而難知入世光塵寇輔眞遇而莫測奚必神仙  
列傳如班范之堪徵壺嶠高蹤若金張之易考乎且夫安期  
棗實漢士方嘗秦洞桃花晉漁乃見青泥化石雖叔夜而難  
逢絳雪遺丹至薛昭而始驗然則眞靈會合定有前因變化  
周流皆非偶爾者矣至其願海宏包神輪遍匝同鄒嶧轍環  
之志合瞿曇筏渡之心著罷殘碁念搏沙之浩劫攜將上藥  
傳駐景之神方則如淬劍吹簫鬻梳賣墨以及擘櫛磨鏡挂  
笠題蕉自唐迄今莫可殫述固非九丹貯鼎祕惜元關一鶴

停煙逍遙紫府者所得同年而語也往者淮浦方理漕渠欲  
涸有司致禱求利濟焉俄而尺漲平添千艘遞進比流通於  
漕水齊轉運於盟津雷未舉而雲已飛帆不張而風自利斯  
則功參

國計德洽民心祀典所稱實爲符契允宜元都立觀苦縣桀  
碑象靈囿於瓊宮標元徽於玉篆魚車綺輅五雲閣史之書  
桂酒椒漿三閭大夫之曲以申衆慕以奮洪庥故孚佑之祠  
累年彌夥矣邯鄲前朝壯縣甸服莊墟闐闐雷喧輪謁霧集  
叢臺落日趙家鼓瑟之場沁水寒沙秦將拋戈之地烽煙久  
熄羅綺俱灰獨仙躅巋然常新耳目凡佳流勝士過客羈人  
莫不仰鏡趨風芳蘩潔潦冥情暫豁淡淨世之因緣道念旋  
生求至人之髣髴不誠足以發矇振聵益俗培風也哉某質



謝懷靈空依聖宇情殷捧拂未乞閒身因輅傳之經由感棟  
栢之隨陟爰捐積俸用表虔襟冀使黼構維新芝廬式煥羽  
幢紺幄爛照雲霞金骨珠光圓爭日月雖復吸風飲露何勞  
樽篋之陳御氣排煙不假馨香之薦庶幾覲瞻有寄欽饗兼  
申誠切於昭義同如在若夫遠尋根葉上溯淵源啓大覺於  
華胥受真符於太乙文膺十賚班位相聯訣證參同津梁有  
自故祠中前殿祀雲房焉至若顧影含歡因機達化迷途乍  
復卽煉黃芽俗慮全捐旋生火聚由熟寐酣眠之後得長生  
久眎之方道有攸傳仙不虛覲非夫清資異稟勇悟精修胡  
能乃爾故後殿亦祀盧生焉數象三元神孚一氣橋原灞岸  
遠通銀漢之楂店是新豐乃易瑤壇之榜從此紫山長曉棲  
神爵於觚棱碧瓦初寒散奇芬於井竿落成有慶經始毋忘

襄事姓名成書於石

邯鄲呂翁遇盧生事在開元中而世以呂翁爲純陽考純陽咸通中舉進士不第遊長安酒肆遇雲房得道距開元且百三十年時地渺不相涉意卽一事而小說傳聞記載異辭耶今邯鄲祀純陽及雲房盧生勢不能不以純陽爲呂翁矣此碑頗費周折

自記

上猶縣教諭元君墓誌銘

君諱章字載求號崧厓南城人也本姓危氏高祖某改姓元氏廣微疎東遂大門閭叔夜奚稽肆開氏族祖廷亮縣學生地贈儒林郎父夢梅縣學生地贈修職郎晉贈儒林郎纘德通門黃聲橫塾少游善人忘鄉里之樂彥方長者卜子孫之賢君生蘊淳氣少豁英抱承祖視而涕泣讀父書而奉勤乾

隆庚寅舉於鄉公車屢躋大挑二等以教諭用歷攝新淦吉  
水選補上猶莘莘俎豆鏘鏘鐘鼓與山發采彭水流春人懷  
振鐸之聲士服安弦之教林禽送響對之哦詩蔬圃在門采  
以供客鄭虔之嗜酒官長咸知麟士之談經生徒曰盛在官  
八年令聞不已然而驥非甘櫪鴻不可籠卑位冷官非所戀  
也復上春官忽得足疾因謝病歸道過揚州養疴於女夫兩  
淮都轉使解歲月旣暇重簪抱朴之方條制兼通高贊桓寬  
之論林嬉水宴豪情間飛山衣田冠野態自若冰清之譽翕  
著巒峙之望何忝旣而息機家衡作賓庠門安車輓輪莞筵  
藻席嚕啐之禮獨懋孝弟之風以興欽賢敬德豈虛致乎君  
培溉根本惇敘宗族修祠理墓睦婣洽鄰養寡女教遺孤外  
急人務內勤家政是以容衛告瘁須髮早白晚歲遊心物表

緬想人外仲長統之田宅足以優游謝幼與之邱壑恣其歌  
歎而率率酬應息偃難常棲屑往還縣愜己甚寢疾八月流  
然徂化嗚呼哀哉時嘉慶十二年正月十五日年六十六娶  
陶氏封安人先卒于三長逢泰候補知縣次芹國子監生三  
韶試用山西巡檢先卒孫五曾孫一女四長適今湖南按察  
司使曾煥次適國子監生蔡志祖三適章某四適縣學生劉  
又蘇以某年月日葬君于某原晉鈞客邦上與君同舍湖春  
放牒星晚接孟哀絲濫竹同寫其暢袞農歌輟議亦資於談  
柄齒宿意新嬰鏤哉翁也忽一夕舉觴屬釣求爲誌墓再三  
要約囁嚅許之心訝不祥孰知果遽爾也君歿歲餘仲子過  
吳門述君遺誠重以爲請嗚呼念橋公沃酒之言希季子挂  
劍之義雖愧不文其忍辭諸乃爲銘曰

古之選舉經明行修君充秋賦蓋其匹儔古之學官惇師老  
德君於猶川庶乃遺則翩然拂衣風逸雲野淮流泛觴江漚  
結社濯足紅泉安神白室頤壽葆和年命遽畢子行勞生傳  
奕醉死衰疾之由將毋由此生席豐澤沒垂令聲以子以孫  
延於雲初零露歎逝寒冰思舊晷念老成曷其復邁姑山峩  
峩盱水湯湯文茲元石知余弗忘

江都縣學生汪君暨配鄒孺人合葬墓誌銘

嘉慶十五年十一月吾友汪喜孫遣書乞銘其祖父母之墓  
并示其考所撰靈表弗敢辭也依而敘之君諱一元字兆初  
江都人也封嶠命氏遠肇殷藩節鉞起家實徵唐代至二十  
五世祖承清宋嘉祐中居歙縣之古唐高祖文耀官餘姚縣  
知縣杜喬賢者之後丹水酬庸陸雲神明之宰浚儀圖象曾

祖應健祖鎬京始遷江都父良澤竝通材上憲韜耀中林高  
文絕軌流稱江介壯武八葉銅川六世清門望族由來舊矣  
君稟昆軸之秀感少微而生長源身輕定由仙謫仲宣體弱  
無損才高嬌嬈鄰上而謹過折蓼岐疑庭下而慕溪含菽若  
其推梨讓棗敦受悌之情薦果嗽蔬雪烝嘗之涕又文舉之  
孔懷元保之孝思也弱冠補諸生矩步學庭蜚華莼苑搢紳  
之士仰其方聞巾卷之徒就而讐問家故寒悴庖御弗充屠  
龍之技終窮雕虎之試無已於是講學畱衣撰碑受絹陶奴  
送米則枵腹猶辭季子指金亦拂手不顧觥觥焉獄獄焉赤  
石不斂節士之必者乎其學周通不名一莼凡事斯珞璫之  
談季主培生之術驗灰絜黍之準戛石敲金之節罔不洞參  
奧旨妙闢機緘五行有徵六律無舛葢嘗射覆握粟畫樞而

符其數推步歲厯閱時而合於官驗此數端足窺全蘊既精  
運數預克逝期隗炤之版妻子莫知元兔之算時日無爽逮  
其卒也乃其神之嗚呼凌雲一笑入壙賦詩此之達懷何謝  
往詰平生饌箸充溢黃墨精謹值歲祲家徒三篋遂亾茂陵  
遺草不貯琴臺揚子元經眞覆醬瓿嗚呼惜哉娶鄒孺人諱  
維貞與君同里其先無錫人也蕙心玉映松節霜高懋嬪則  
于張箴嗣徽華于班誠父孫處士教授家塾孺人屏後聽書  
咸能聞誦伏家小女傳二十八篇蔡氏文姬記四百餘卷乃  
其志儕徹瑱躬瘁采菱力養衰親兼撫弱弟嗟彼婉孌誰則  
如之年二十歸汪氏卽贅于家維時尊章徂逝伯叔仳離鹿  
車無可歸之里魚性無可薦之廟孺人乃請於父卽其別室  
祀舅姑焉跡等庶春情同巷祭而琴瑟靜好蘋蘩誠敬興言

婦順若此綦難厥後門閭儼立盆瓶獨司縣短檠而宵織汲  
寒泉而朝澣方之簪者抑又劬矣泉乎黔婁斂畢柳季諡成  
惟踽踽之嫗嫗係笑笑之弱息青障素褥集珍髭而授經黑  
質赤文倚鍼神而給食淒其風雨載厯星霜不幸穀賊妨年  
鴻吸徧野遂乃轉棲蓬華游丐葭苧中夜星辰仰瞻屋漏凌  
晨氛靄遙睇爨煙攜文凝而征公對韓娥而慟哭傷哉貧也  
一至斯乎晚獲南陔之養庶亭西山之景乃積勞成損羞饕  
啜而弗甘纏疾告終薨苓進而罔效此風樹所以茹痛蓼莪  
所以銜恤者也嗚呼孝標之聲塵寂寞書論具存宣文之母  
子播遷眎聽無闕猶得垂精汗竹享報桑榆今堙暖若彼衰  
謝如此否極必泰屈久而信其在於後嗣乎君卒于乾隆十  
四年四月春秋四十有二孺人卒于五十二年七月春秋七



十有六子二長中乾隆丁酉選拔貢生學該七略言成一家  
鬱爲儒宗中壽而殞次庚早殤女二適黃適畢孫喜孫嘉慶  
丁卯舉人克世其家將大厥後某年月日葬君于某原某年  
月日孺人耐焉白日佳城啓滕公之室紅簫故隴徵烏氏之  
祥銘曰

晦時其暉霽霽其露極晦而光積淡乃注朱紫粉袞邇榮韋  
布祿飾非華蒿簪詎素汪氏之儒淪于匹庶畜德懷文知命  
委數曰儷女師羶哉內助疲曳年饑瘵傷齒暮子亢厥宗孫  
衍其祚身遯澤畱前堙後著鶴唳蘭巖鳳騫梧樹有牙其門  
兆此邱墓

鮑貞女誄

并序

鮑貞女固始人吳門沈觀察家青衣也綳襦甫離汙丁惡歲

閭井不復遂困流庸泉長將爲擇偶女臨陳辭曾字董氏誓  
不它適守報版之約無中谷之怨於是觀察義之勝求其夫  
久之無耗女乃秉節願以畢世塗面未經於同牢封髮無煩  
於署帛心畫早定身範自絜諭以權宜確乎不拔觀察旣卒  
依第五郎中立孝廉以居爲之執炊年五十而歿嗟乎龍憐  
族細生自草萊阿稽命屯流爲厮養非有繁裘之儀衿襦之  
戒也乃能匪石其心孤松其操誠足使泰室引袂桓螯後塵  
累德之辭當之曷愧知其事者多爲表著余亦誄之云  
猗猗素藹掩掩瑤草土瘠根微馨揚秀葆物旣有之人胡不  
然含露稟懿維貞維艱吁嗟鮑女託生窮隘底非馬桓訓靡  
班蔡剝樹頻手擔囊去里嚮身貴家宣力稚齒讀賦座側誦  
詩泥中彼其穎慧不如樸忠幼字董門寸心炯向昏雖主命

節敢自喪雉娉禮絕鴻侶音沈操箕沒齒掩鏡勵心蘇蘭新  
桂飯糗羹藜服勤丁嗇意泰色怡霜露卅易冰雪一操閨閤  
欽聲臧獲改貌木則有枝水則有波髻鬢有識髭髥靡它北  
宮徹璵南陽書屏彼猶有屬此則安歸玉性自溫竹筠必勁  
貞詎教成義非情定始衰之年沈疴莫瘳魂溯汝流骨香吳  
土佩璜輟浣相杼停春貞木慘翠怨禽嘯風漢賦青衣唐諫  
高慙彤管斯煌幽芬不隕

汪孝婦誄

井序

純至之行根於性真絕之事成於天故匹庶師心自合彝教  
冥漠降旤乃彰奇節其汪孝婦之謂乎孝婦長洲人姓吳氏  
歸汪某居齊門之蕭家巷生非華族嬪於單門翁老而貧姑  
病而廢所天早逝身撫弱嬰比巴婦之懷清志淮陽之終養

無何鄰火不戒延及婦家婦方抱女念姑在牀以女授翁衝  
煙入棖遂俱焚死嘉慶丁卯九月也婦年二十有八是時燦  
飛萬瓦光燭半霄智者念渝勇者氣奪自非中懷極摯秉彝  
奮發疇能迅決哉嗚呼同貞義操刀之情靡劉妻叩殯之報  
蕭芝其盡池魚竟殃天道難知咸有惑焉余竊謂貫日之忠  
屠腸乃見凌霜之烈刎頸則顯向使孝婦遂負逃之願免焚  
如之凶念身急難寧有差異然事以平晦名以生滅不過里  
閭咨嗟親屬慶幸已耳今燎頂燔軀遂與烈焰同耀不與煙  
灰俱滅柳子所謂祝融回祿之相子者歟災殊毫社而死重  
其姬旌解縣田而悲等介子誄之宜也誄曰

烈哉孝婦渠秀延州衰門之女實命不猶烏羊遣嫁黃鵠啗  
儔江水晝汲機聲曉收照燕災興犇牛勢疾鬱攸從風謠諒

出出足蹶聲喧老奔稚逸孝婦在門病姑在室孝婦曰呼急  
哉其危婦不援姑將以誘誰觸烽排閨負姑以馳炎官截戶  
飛焰灼楣熾釜跳魚洪鑪旋螳哀哀婦姑慘與爲比尋躅燼  
餘驗形灰裏肌爍骨焦臂交胷倚嗚呼哀哉火尊不親宜有  
司命胡縱女丁殘賢賊正或疑報爽或歸數定意天不然殆  
炳畸行猗維孝婦至性靡倫安恒履順孰測其真竹炙斯壽  
椒焚乃薰旤奇事炫遇酙名尊王謝之姝崔盧之嫵禴翟康  
娛閨惟息宴有反其脣矧殉其變正命成仁乃慙窮賤齊女  
臺南孝婦之居枯槁斷甕過者欷歔葬姚有冢表衛無閭臚  
茲顛末閭史其書

江蘇官屬公祭浙江提督壯烈伯李忠毅公文

代

在咎延伯中矢駭動洛中陳安失矛哀騰隴上修戈戟而賦

同仇聽鼓譟而思良將故死綏者國卹犯難者羣愴矧乃苞  
枿未黜大樹平凋軀捐颶海恨湧胥潮遭窮寇之反噬變丈  
人之吉爻識值彭亡功敗垂成之際事殊周殉患生不測之  
交者乎惟公援臂子孫雁門家世生小登之輿區發大輪之  
間氣隴西於六郡居首婁北之一星應瑞幼而英時長更沈  
勇劍膽霜明戟髯風動頓象鼻而盤旋竝虎幢而騰踴成荆  
聞而氣奪回育遇而神悚兵書七卷陣法三門龍豹手握蛇  
鳥胸屯聚米而成山谷聽律而占風雲宿國一丈之槍典君  
一雙之戟甘蠅紀昌之祕鈔白猿越女之刺擊莫不精嫻元  
奧長兼巧力良乃上將之元萬人之敵者也當其應馬射之  
選列鷹揚之衛充國則超補羽林仲昇則初爲校尉龍旗豹  
尾從羽獵於三垂貝冑犀函著驍騰於七萃逮夫分符玉帳

領隊銀刀勤驅劉而肄武整鶴列以宣勞傾家遠同於李場  
祭河奚謝於敖曹雖數奇而秋貶愈志激而功高於是明徹  
人才見知於僕射龐參武略特薦於元僚東南地泊滄瀾天  
浮絕島蝸像閃屍鯨鯢震掉據田橫之窟穴資周迪之牙爪  
截商舶而鉤飛逼漁莊而炬燎沙嶼朝魁郭魏恃狡匪一日  
矣公旣數總貔貅熟逢魍魎乃募三明飭五兩立嚴罰懸渴  
賞發越國之習流陳賀齊之精仗興霸捧盃以通酌叔虎被  
羽而先上白徒用命練材矯掌屢挫呂鮪之鋒痛剪盧循之  
黨若夫澎湖巨浸海郡孤懸瀛洲遜其饒樂甌脫殺其表延  
防飛鯨之鼓翼餌嚙鱣以垂涎燿豳雞籠驚邨陰之火陣泥  
封鹿耳枉橫浦之戈船加以上寇竊發誘致島夷山賊助亂  
臺嶠被圍兼顧則腹背爲慮偏擊則首尾難支公雷電疾驅

神明祕算近者先創造者亦竄旣而再擾重溟爭險彼岸奇  
兵撫背寧非赤壁之鏖勁旅熱心何止長江之斷落際窮追  
危城復捍劬搜伏莽永除滋蔓八遇八克之勢所向無前上  
獲中獲之功於斯爲冠當是時也名知草木姓怖兒童賊憚  
合肥之虎人號平盧之龍聞具孫之弓驚爲霹靂見伯珪之  
馬散若飛蓬 天子嘉乃殊勲特頒顯祿給崇祖之鼓吹賜  
奚斤之麾纛忠嗣佩四將之印士行作八州之督鉅封劇鎮  
遠聽其指麾宿將材官咸從其約束誠以守河之任必使寇  
恟擊郾之能無踰賈復也公乃感 恩益奮受寵彌驚徐勉  
還家則羣犬皆吠裴俠向府別五鼓才鳴武侯之討蠻方身  
遑自惜光顏之仇汴賊誓不俱生畛域胥忘藩籬靡設張宗  
則願爲後拒肯待探名文季則常在前鋒詎推同列蓋公以



爲張羅而咬唱和不差者其利等也同舟而濟風波相救者其患同也公之勤幹公忠有如此者素廣招延尤善任使荆楚劍客江淮弩士翹闕扛鼎之材挾馬曳牛之技悉爲腹心常供臂指情均甘苦義同生死雖復中額傷顱刺腸斃面靡不囊足復馳塞創再戰升長竿以垂絙冒白刃以空拳是則卻克之并轡援枹伏威之禽敵拔箭實有以作其氣矣至其運謀不測應變無方或鑿舟以鷺沒或聯艦而鳥翔或則標幟朦朧黑稍將軍之號或則伏精構艦白衣商賈之裝是以雕面褫魂絳頭匿影過鯨渚而沙平斷鼉梁而浪靜落伽山外灌門海邊昏霾盡豁陰火不然何其壯哉猶復好讀春秋工諧競病彥章以儒服養威成侯以雅歌陶性訝楊惛爲武士非絳灌之無文知陸遜是書生同孫吳之制勝要其餘事

遣軍而已昨歲臘月追蔡牽於粵之黑水洋飲冰勵士擁盾  
麾兵鏖於野而濺沫指銅柱以懸旌神蜃逃其帆影馮夷暗  
其鼓聲若洪爐之燎毛髮如渤澥之灌流螢牽僅餘三舟存  
以呼吸獸困機張魚跳網及此談笑而整暇彼驚號而逼急  
方將縛婢徒於鷁首殲餘孽於霜鋒歌蘭陵而奏捷植柳林  
以旌功而水堆逆浪天反顛風令贊油機因而灼面思政火  
積遂乃洞霄公薨賊逸溪可痛也嗚呼孫恩未斬先害山松  
子陽稽誅反戕君叔戰臨危地竟爲不祥之兵出鑿凶門終  
非無難之督或謂李晟衣錦乃誨盜之由鄧艾裹氈味垂堂  
之勗則夫鼎鼐縮首轅駒俯頭許以持重信其多謀豈其然  
乎事間於

上震悼流涕勅葬立祠贈爵賜祭事付史宓賞延來禩祈連

元甲是去病之殊榮德陽青石成鄧芝之素志蓋韓千秋軍  
鋒之冠不在成功劉景素應赴之窮誠出不意也今者都護  
喪還將軍冢築白虎衛途元媛嘯谷哭寬饒而衛卒同聲祭  
重允而軍士割肉鄭公丹旄色灰壇上之旗周勃短簫聲變  
軍中之曲某等情聯轂佩譽仰圭璋雖巾扇其未接幸旂旛  
之相望悲伏波之不返悼馬服之云亾望羊碑而涕雪景樂  
社而心傷然而番君之忠著於令甲臨淮之法畱於將校  
帝表衛國之墳官立睢陽之廟世券鐵牢穹碑金耀澤及黔  
蒸威誓丹徼公實不死又奚弔焉遙將薄醪敬因祝史神之  
宴娛庶幾醉止伏願持楚王之騎默助蕭猷杖司農之戈更  
擊朱泚弓刀自動驗絳賊之俘禽風雨橫飛知松陵之披靡

悼桃樹文

有序

毀齒之年戲於鄰圃有桃始生于牆之隅柔類蘭枝秀奪草  
色心乎愛矣悵悵不怡已圃券屬余家鑿坯通焉於是掘土  
晨培剡泉夕漑剪綵爲旛祝其頑吉畫牆如卦驗其低高三  
年而翠羽條條明霞爛爛花時天漏繼以飄風余乃擎蓋而  
翫其芳攀矜而承其英見者哂之快墨走避然不勝其惜也  
樹旣婆娑余亦加長出遊來返則園丁伐之矣嗟夫玉衡之  
精淪入五沃瑤池之種散滿八簣亦復何圃無桃何花不謝  
然而縹緲壓架手鈔者意專馨飮充廚口嗜者心憶矧孩提  
之性戀甚宿桑歲月不居感同種柳者乎摧花斫樹初無阮  
婦之嗔續斷回枯莫覓雲翹之况亦可悼也乃爲辭曰  
英英綺樹灼灼夭采積寸成株酣春試蕾豔我童心遲君累  
載芳意三申華年六改仙期俄頃韶序倉皇花丁劫運人滯

遐鄉同櫻見伐無李代僵訟言旣晚茹恨斯長凭檻逢愁臨  
風憶笑影失故蹊魂遙夕照總角徒憐轉瞬相弔餘卉滋繁  
余情匪好

孫女禮貞哀辭

余孫女禮貞生於故里提攜來吳邁疾殤折買地瘞之在葑  
門內南園楊王廟之側其殤也當嘉慶之戊辰七月廿二日  
瘞以次日計其生凡三十有四月嗚呼齒墀澤蘭惠同金瓠  
感吳市舞鶴之痛無河陽歸骨之期淡可哀也乃爲辭曰  
嗚呼哀哉身播稚齡骨銷客土故鬼無親斃魂曷主珠輝未  
揚蘭秀乍吐慧咲縈腸靈倪切腑閨閨舊城錢王廢圃煙白  
草淡松稀月苦辭爾親懷往宅茲所何有之鄉無念爾祖嗚  
呼哀哉

書題衿帖後

右題衿館額一方諸城劉石庵相國書記一首鎮洋彭甘亭  
上舍謨錢唐梁山舟侍講書嘉慶十年孟冬撫勒上石嵌於  
館外左廊之壁標識盛軌昭式來旌非偶然已夫二公之書  
分塗殊建一時之譽逐影隨聲而家雞野鷺互自輕誚閣梨  
法身漫爲甲乙余爭道乏悟臨池鮮功緘口時賢未敢覈論  
諦觀此跡聊發妄談竊謂劉筆畫沙全資逆勢梁書屈玉頗  
運虛光劉法休明無遁峻之恨梁師登善有調和之適語其  
牋牘則晉意劉多至乃碑版則顏筋梁得還章草之舊觀躋  
妙楷之崇臺各詣精能允爲魁傑蓋其消融液滓斂縮圭稜  
齒雖髦而力存貌或離而神合伊所同也遲者士夫溺於習  
尚類挂腰以稱壯亦植頰以取姿遂使華櫝遺珠明眸背鏡

或乃矯以側削謂勝癡肥要之擊指無權精魄不攝百步之  
笑厥失維均覘夫禾卉萃蕚而莖跗員舒鈞盧光茫而鋒鏑  
柔繞物象有驗書理可徵準是推之優劣見矣茲館名仿柯  
古義姬平津亦旣耀以瓊文洵宜壽之貞石庶幾彥倫書壁  
爲元圃之華蕭字名齋卽東洛之寶劉已逝者梁尚歸然觀  
斯品斷其許附庾張之後乎